


蔡中郎文集序

漢蔡中郎傳邕博學辭章為靈紀十
齋及雜文凡百四篇傳於世傳所載
者釋誨幽冀刺史闕疏陳政要七事
金商門塔災異疏被收時表及世傳
獨斷女訓文選陳太丘等碑文初學
記短人賦總十數篇而已按唐書藝



CENTRAL LIBRARY, TAIWAN, R.O.C.

文志洎吳氏西齋書目竝云邕集十
五卷今之所傳總十卷亡外計六十
四篇其中可疑者宗廟頌贊述武皇
平亂之功又有昊天眷祐我魏之句
蓋以宗廟指魏也又有魏武帝祀喬
太尉文稱丞相冀州牧魏主操謹遣
使再拜祀姜伯淮碑稱建安二年卒

劉鎮南碑建安二年薨太和二年
葬按邕本傳董卓被誅邕為王允所
害時年六十一據邕金商門荅災異
被收表云臣今年四十八靈帝光和
元年也董卓被誅獻帝初平三年也
光和元年戊子至初平三年壬申邕
正六十一矣又初年至四年改興平

二年改建安至五年正月薨操薨三月改建康十月禪子魏王丕即初平四年是為二十六年太和二年廼魏明帝之二季至是又八年計邕死已三十六年矣按初平已前操尚在誅卓之歲操始為東郡太守破黃巾於壽張至建安十三年操自為丞相二

十一年操自進為魏王亦有魏宗廟而操不得先稱魏王武帝及武皇也其姜伯淮鎮南薨葬相後年代差遠邕安得紀述耶是集也今既缺五卷矣見所傳者蓋後之好事者不本事迹編他人之文相混之耳非十五卷之本編固矣建安黃初之文體多相

類復不逮廣披衆集固不可知其誰
之作也偶閱而有得識于帙末天聖
紀號龍集癸亥余月哉生明後八日
海陵西齋平陽歐靜識之序

劔石道人王鏐書

平標自為

蔡中郎文集目錄

卷一

故太尉橋公廟碑

東鼎銘

中鼎銘

西鼎銘

黃戒銘

太尉橋公碑頌

朱公叔謚議

朱公叔鼎銘

朱公叔墳前石碑

王子喬碑

卷二

郭有道太原郭林宗碑

文範先生陳仲弓銘

陳太丘碑

陳太丘廟碑銘

汝南周巨勝碑

彭城姜伯淮碑

貞節先生陳留范之雲銘

玄文先生李子材銘

處士國叔剛銘

卷三

司空楊公碑

司空臨晉侯楊公碑

漢太尉楊公碑

文烈侯楊公碑



司空文烈侯楊公碑

琅琊王傅蔡公碑

劉鎮南碑

卷四

太傅安樂鄉文恭侯胡公碑

胡公碑銘

太傅胡公碑

胡太傅祠前銘

漢交趾都尉胡府君夫人黃氏神誥

太傅安樂侯胡公夫人靈表

議郎胡公夫人哀讚

卷五

光武濟陽宮碑

太尉汝南李公碑

陳留索昏庫上里社銘

陳留太守胡公碑

陳留太守胡公碑銘

卷六

答丞相可齋議

幽冀二州刺史久闕疏

難夏育上言鮮卑仍犯諸郡

答詔問災異八事

被收時表

卷七

和熹鄧后謚議

為陳留太守上孝子

為邊文禮

吉

薦皇甫規

卷八

薦太尉董卓何相國

色郡太守謝版

宗廟祝嘏辭

九祝辭

宗廟迭毀議

上始加元服與羣臣上壽

表賀錄換誤上章謝罪



國家圖書館, NATIONAL CENTRAL LIBRARY, TAIWAN, R.O.C.

讓高陽侯印綬符策

再讓高陽侯印綬符策

卷九

京兆樊忠渠頌

郡掾史張玄祠堂碑記銘

袁滿來碑銘

童幼胡根碑銘

司徒袁公夫人馬氏碑銘

濟北相崔君夫人誄

卷十

明堂月令論

月令問答

外紀

蔡邕行贊傳

胡廣黃瓊頌

上漢書十志疏

述行賦

短人賦



國家圖書館, NATIONAL CENTRAL LIBRARY, TAIWAN, R.O.C.

飲馬長城塞行
篆勢
隸勢
楷勢

蔡中郎文集卷第一

左中郎將蔡邕伯喈

故太尉橋公廟碑

光光烈考伊美元公克明克哲寶睿實聰如淵之浚
如嶽之嵩威壯虓虎文繁雕龍撫柔疆垂戎狄率從
敷教中夏五典攸通帝謂我后朕加君功命君三事
時亮天工公拜稽首翼翼惟恭左右天子祗厥勳庸
庶績既熙黎民時雍上下謐寧八方和同丕顯伊德
作憲萬邦公諱玄字公祖少辟孝廉辟司徒大將軍

府為侍御史收一州典五

郡出將邊營入掌機密歷三卿同三司享年七十五
光和七年夏五月甲寅以太中大夫薨于京師朝廷
所以弔贈如前傳之儀九月乙酉葬於某所三孤故
臣門人相與述公言行咨度禮制文德銘于三鼎武
功勒於鉦鉞官簿次第事之實錄書于碑陰俾爾昆

裔永有仰於碑陰

橋氏之先出自黃帝帝葬于橋山子孫之紹基立姓

者咸以為氏漢興世以禮樂為業高祖諱仁位至大
鴻臚列名於儒林祖侍中廣川相考東萊太守公稟
性貞純幼有弘姿剛而不虐威而不猛聞仁必行睹
義斯居文以典術守以繼固弱冠從政當官而行刺
史周公辟舉從事所部二千石受取有驗公糾發贓
罪致之於理時有椒房桂戚之託周公累息公不為
之動史魚之勁直山甫之不阿於是始形舉孝廉除
郎中洛陽左尉特進潁王梁不疑為河南尹當事以
對是時畏其權寵而為屈辱者多矣公不折節解印

卷五
九
綬去辟司徒舉高第補侍御史以詔書考司隸校尉
趙祁事廷尉郭貞私與公書非接使御命之儀公封
書以聞貞以文章得用鬼薪公離司寇辟大將軍梁
公幕府屢以救正于其隆指將軍嘉之無言不讐又
以高第補侍御史在職旬月羗戎匪茹震驚隴漢西
府舉公拜涼州刺史威名克宣凶虜革心清風席卷
至則無事車師後部阿羅多卑君相與爭國與兵作
亂公遣從事牛稱何傳舉輕騎奉辭責罪收阿羅多
卑君繫燉煌正處以兩阿羅多爲王卑君侯稱以

使副指除侯部不動干戈揮鞭而定西域之事人以
爲美談又值饑荒諸郡饑餓公開倉廩以貸救其命
主者以舊典宜先請公曰若先請民已死廩訖乃上
之詔報曰邊穀不得妄出玄擅出於是玄有沒黯憂
民之心後不以爲常公達於事情剖斷不疑皆此類
也遷齊相視民如保赤子討惡若赴水火刑明賞遂
民知勸懼臨淄令賂財賊多罪正受鞠就刑沒齒無
怨竟以不先請免官徵拜上谷太守民有父子俱行
凶人人惡言當道曉之不止其子殺人而捕得公以

其見悔辨直不舉文書以遇赦今蕃縣有帝舜廟以
故事齊祠戶曹史張機有懲罰貨祠巫自託以舜命
約公云不得譴公覺其奸態收考首伏即日伏辜遷
漢陽太守上邽令皇甫禎賊罪明審收考髡鉗死于
冀市後以病去徵拜議郎司徒長史循王惺桓帝同
產以懷逆謀黜封瘿陶王以公長於襟帶拜鉅鹿太
守惺畏怖明憲檢于靜息自將作大匠徵未到而章
謗先入故轉拜議郎遂用免官徵度遼將軍遷河南
尹少府大鴻臚司徒司空託病而去悉引衆災難亦

已負公皆以自劾遜位歲餘拜尚書今時河間相蓋
升以朝廷在藩國時隣近舊恩歷河南太守太中大
夫在郡受取數億以上創毒深刻公表升會放狼籍
不顧天網損辱國家爲上招怨當肆市朝以謝兆民
幸遇贖令罪除惡在可免升官禁錮終身沒入財賂
非法之物以充帑藏懲戒羣下連表上不納而升遷
爲侍中公稱病辭徙拜光祿大夫復拜太尉如前遜
位復拜少府病不就職拜太中大夫凡所獲祿皆公
府所特表選臨難受位自九列之後乃以丕貶公紀

綱張弛勇決不回 是非明作速於察機燕居從容
申申天和樂寬裕愛士親仁凡見公容貌聞公聲
音莫不熙怡悅懌思樂模則來者忘歸去者願還雅
性謙克不吝於利欲雖衆子羣孫竝在仕次曾無順
媚一言之求身沒之日無獲大位在百里者莫得好
縣比方公孫未有若茲者也初公爲舍於舊里弟卒
推與其孤至於卽世樞殯無所清儉仁與之効於斯
爲著巍巍乎若德允世之表儀也已

東鼎銘

維建寧三年秋八月丁丑延公于玉堂前廷及詔曰
其以大鴻臚橋玄爲司空再拜稽首以讓帝曰俞往
哉三讓然後受命公乃虔恭夙夜帝采勤施八方
作穆穆以對揚天子不顯休命越在先民毗於天子
罔不著其股肱畢其思心式率天行式昭德音公亦
克紹厥猷鑒于法罔敢不法憲于誠罔敢不誠用德

是羣后保乂帝家勛在方冊民咸曰休哉惟帝念功
越若來二月丁丑遷於司徒

中鼎銘

維建寧四年三月丁丑延公登于玉堂前廷乃制詔
曰其以司空橋玄爲司徒公拜稽首以讓帝曰俞往
哉三讓然後受命公允廸厥德宣力肆勤戰戰兢兢
以役帝事率夫百辟媚于天子天子曰都慎厥身修
思永同寅協恭以和天衷德則昭之違則塞之回乃
不敢不弼枉乃不敢不匡股肱之事旣克三事之深
允備災眚作見乃引其責曰凡庶徵不若彝倫不叙
是惟臣之職祗以疾告表越十月庚午記此

西鼎銘

維光和元年冬十二月丁巳延公入崇德殿前乃制
詔曰其以光祿大夫玄爲太尉公拜稽首曰臣聞之
三讓莫或克從臣不敢辭臣犬馬齒七十可以生可
以死其戮力閑私悉心在公以盡爲臣之節于時侍
從陛階與聞公之昌言者莫不惕厲如履薄冰旣乃
碑表百代

蔡中郎集卷第五終

蔡中郎集卷第六

漢 陳留蔡邕著

明新安汪士賢校

黃鉞銘

孝桓之季年鮮卑入塞盜起匈奴左部梁州叛羌逼
 迫兵誅淫衍東夷高句麗音匹 飛也子百固逆謀並發
 三垂騷然為國憂念西府表橋公昔在涼州柔遠能
 邇不煩軍師而車師克定及在上谷漢陽連在營郡
 膂力方剛明集士衆徵拜度遼將軍始受旄鉞鉦鼓

之任扞禦三垂公以吏士頻年在外勤於奔命人馬
疲羸撓鈍請且息州營橫發之役以補困憊朝廷許
之於是儲廩豐饒室罄不懸人逸馬畜弓勁矢利而
經用省息官有餘資執事無放散之尤簿書有進入
之羸治兵示威戎士踴躍旌旗耀日金鼓霆奮守有
山嶽之固攻有必克之勢羗戎授首于西疆百固冰
散于東鄰鮮甲收迹烽燧不舉眎事三年馬不帶缺
音決 刺也弓不受彊音樞 弓弩端 弦府居也是用鏤石作茲鉦鉞軍
鼓陳之東階以昭公文武之勛焉銘曰帝命將軍秉

茲黃鉞威靈振耀如火之烈公之在位羣狄斯柔齊
斧罔設人士斯休

太尉橋公碑頌

公諱玄字公祖梁國睢陽人也大鴻臚之曾孫廣州
相之孫東萊太守之元子也膺受純性誕有特表岐
嶷而超等總角而逸羣至于初紳高明卓異爲衆傑
雄其性疾華尚朴有百折不繞臨大節而不可奪之
風經藝傳記周覽博涉瑰奇在前靡所不識當世是
以服重器歸高名州郡交請待以訪斷歷端首則義

可行處爪牙而威以布察孝廉除郎中洛陽左尉以
公事去辟司徒舉高第侍御史直道而往用免其任
辟大將軍西府表拜涼州刺史遷齊相以公事去詔
書印綬卽家拜上谷太守遷漢陽太守徵拜議郎司
徒長史鉅鹿太守被詔書爲將作大匠爲受罰者所
章拜議郎卽徵拜度遼將軍遷河南尹少府大鴻臚
遂陟司空司徒託痾遜位起家拜尚書令以疾篤稱
拜光祿大夫後拜太尉久病自替復爲少府太中大
夫春秋七十五光和七年五月甲寅薨公性質直不

憚強禦在憲臺則有盡規之忠領州郡則有虎_音軫

唇瘍也之威其拔賢如旋流討惡如霆擊每所臨向清

風先翔遠近豫震茲可謂超越衆庶彰於遠邇者已

於是故吏司徒博陵崔烈廷尉河南吳整等以為至

德在已揚之由人苟不皦述夫何考焉乃共勒嘉石


永昭芳烈遂作頌曰赫矣橋父秉文握武內為宗幹

出為藩輔在憲彈枉竟由厥矩允牧于涼刈彼裔土

爰將度遼亦用齊斧敷教四畿旋統京宇敦茲五服

衆庶是與膺踐七命翼我哲聖登空補袞陟徒訓敬

尹尉清宸熙帝之政終始為貞典章以定遺愛在民
皇哀其命立石刊銘莫遁斯聽魂而有靈萬億其盛



Handwritten marks or scribbles at the bottom left corner of the page.

朱公叔謚議

漢益州刺史南陽朱公叔卒門人陳季珪等議所謚云宜曰忠文子陳留蔡邕議曰昔在聖人之制謚也將以勸善彰惡俾民興行賢愚臧否依事從實雖文武之美幽厲之穢罔不具存自王公以降至于列國大夫皆用配號傳于無窮秦以世言溢而黜其事漢興以來惟天子與五等之爵然後有之公卿大臣其

禮闕焉歷世彌久莫之或修益州府君貫綜典術率由舊章始與諸儒考禮定議加陳留府君以益州之謚是後覽之者亦無間焉今子竄纂襲前業不忘遺則孝既至矣禮實宜之謹覽陳生之議思忠文之意參之群典籍之謚法夫萬類莫貴乎人百行莫美乎忠故夏后氏正以人統教以忠德然則忠也者入德之至也而猶有三焉孔子曰進思盡忠又曰臣事君以忠奉上之忠也曰為人謀而不忠乎又曰忠焉能勿誨乎謀誨之忠也春秋左傳曰小人之獄必以情

情忠之屬也又曰上恩利人曰忠撫下之忠也三者人之則而忠行乎其中益州府君自始事至沒身忠言不輟乎口忠謀不已乎心其在帝室正身危行言如砥矢策合神明蹇蹇之諫文章具存奉上忠矣其在部臣匡救善導出自一心疑不我聽者果有躋履不測之禍謀誨忠矣爰牧冀州時值凶荒勞心苦思勤恤度事誅斃貪暴糾敢貴黨雖則強禦當官能行夫豈淫刑將有利也發墓盜柩議而不罪夫豈漏姦察以情也撫下忠矣位在牧伯職據納言秉權食祿

實有年數而居無畜好財貨不益舊糲食布衾繫謂之精麗者昔魯季孫行父卒宰庀音聶具也家器無衣帛之妾無食粟之馬君子曰相三君矣而無私積可不謂忠乎而謚曰文子春秋外傳曰忠文之實也然則文忠之彰也忠以為實文以彰之事通議合兩名一

致是貞儉之稱文也邾子蘧除音除上遷于繹史曰利於民不利於君公曰民苟利矣孤亦與焉於是遷而遂卒謚曰文公是危身利民之稱文也衛大夫孔圉謚曰文子子貢疑焉惟敏而好學不耻下問仲尼與

之是勤學好問之稱文也府君所在屢以忤違玷以深患苟除民害死生之前後三黜一罹疾廢於身危矣兼包六典命世作師猶復宗事趙叟示有攸尊能下問矣有一於此猶可以稱况乃忠兼三義文備三德於古志不悖而謚法亦曰宜矣本議曰忠文子按古之以子配謚者魯之季文子孟懿子衛之孫文子公叔文子皆諸侯之臣也至於王室之卿大夫其尊與諸侯並故以公配春秋曰劉卷卒葬劉文公公羊傳曰劉卷者何天子大夫也經又曰王子虎卒左

傳曰王叔文公卒而如同盟禮也此皆天子大夫得稱其禮與同盟諸侯敵體故也又禮緣臣子咸欲尊其君父故雖侯伯子男之臣自稱其君咸得曰公及其卒也異國之人稱之皆然是以邾子許男稱公以葬春秋之正義也以例言之則府君王室亞卿也有王叔劉氏之比以臣子之辭言之則有邾許稱公之文雖無土而其位是也今日公猶可若稱子則降等多矣懼禮廢日久將詭時聽周有仲山甫伯陽嘉父優老之稱也宋有正考父魯有尼父配謚之稱也春

秋曰孔父子曰伯其父亡之稱也父雖非爵號與天子諸侯咸用優賢禮同順乎門人臣子所稱之宜可於公父之中擇一處焉使不得稱子而已

朱公叔鼎銘

忠文朱公名穆字公叔有殷之胄微子啓以帝乙元子周武王封諸宋以奉成湯之祀至元子啓生公子朱其孫氏焉後自沛遷于南陽之宛遂大於宋爵位相襲烈祖尚書令肅宗之世守于臨淮考曰實爲陳留太守乃及忠文克慎明德以紹服祖禰之遺風悉

心臣事用媚天子顯允其勲蹟尋綜六藝契濶馳思所以啓前惑而覺後疑者疊疊焉雖商偃其猶病諸初舉孝廉除郎中尚書侍郎獨念運際存亡之要乃陳五事諫謀深切退處畎畝以察天象驗應著焉孝順晏駕賊發江淮時辟大將軍府實掌其事用拜宛陵令非其好也遂以疾辭復辟大將軍再拜博士高第作侍御史明司國憲以齊百僚矯枉董直罔肯阿順以黜其位潛于郎中群公並表乃遷議郎登于東觀纂業前史於時冀州凶荒年饑民匱而貪婪之徒

乘之爲虐錫命作牧靜其方隅乃攄洪化奮靈武昭
令德塞群違貞良者封植殘戾者芟夷去惡除盜無
俾比而作慝用陷于非辜復徵拜議郎病免官徵拜
尚書清一以考其素正直以醇其德出納帝命乃無
不允雖龍作納言山甫喉舌靡以尚之享年六十有
四漢皇二十一世延熹六年夏四月乙巳卒于官天
子痛悼詔曰尚書朱穆立節忠亮世篤爾行虔恪機
任守死善道不幸而卒朝廷憫焉今使權譎者中郎
楊貴贈穆益州刺史印綬魂而有靈嘉其寵榮嗚呼

哀哉肆其孤用作茲寶鼎銘載休功俾後裔永用享
祀以知其先之德

朱公叔墳前石碑

維漢二十一世延熹六年粵四月丁巳忠文公益州
太守朱君名穆字公叔卒于京師其五月丙申葬于
宛邑北萬歲亭之陽舊兆域之南其孤野受顧命曰

古者不崇墳不封墓祭服雖三年無不於寢今則易
之吾不取也爾其無拘于俗無廢予誠野欽率遺意
不敢有違封墳三板不起棟宇乃作祠堂于邑中南
舊陽里備器鑄鼎銘功載德懼墳封彌久夷于平壤
於是依德像緣緣雅則設茲方石鎮表靈域用慰其孤
罔極之懷乃申詞曰歆惟忠文時惟朱父實天生德
不承洪緒彌綸典術允廸聖矩好是貞厲疾彼強禦
斷剛若仇柔亦不茹仍用明夷邁難受侮帝曰休哉
朕嘉乃功命汝納言胤汝祖蹤父拜稽首翼翼惟恭

篤斐不忘夙夜在公昊天不弔降茲殘殃不遺一父
俾屏我皇我皇悼心錫詔孔傷位以益州贈之服章
用刊彝器宣昭遺光子子孫孫永載寶藏

蔡中郎集卷第八

漢 陳留蔡邕著

明新安汪士賢校

王子喬碑

王孫子喬者蓋上世之真人也聞其僊舊矣不知興
於何代博問道家或言潁川或言彥蒙初建斯域則
具斯丘傳承先人曰王氏墓紹胤音不繼荒而不祠
歷載彌年莫之能紀暨于永和元年十有二月當臘
之夜上有哭聲其音甚哀附居者往聞而恠之明則

登其墓察焉洪雪下無人踪見一太鳥跡有祭祀之處左右或以爲神其後有人着絳冠大衣杖竹策冢前呼樵孺子尹禿謂曰我王子喬也爾勿復取吾先人墓前樹也須臾忽然不見時令太山萬熙稽古老之言感精瑞之應咨訪其驗信而有徵乃造靈廟以休厥神於是好道之儔自遠來集或絃歌以詠太一或談思以歷丹田其疾病疴瘵者靜躬祈福卽獲祚若不虔恪輒顛踣故知至德之宅兆真人之先祖也延熹八年秋八月皇帝遣使者奉犧牲以致祀

祇懼之敬肅如也相國東萊王章字伯義以爲神聖所興必有銘表昭示後世是以賴鄉仰伯陽之踪關民慕尹喜之風乃會長史邊乾訪及士隸遂樹玄石紀遺烈俾志道者有所覽焉詞曰伊王君德通靈會光耀秉純貞應大道美久榮棄世俗飛神形翔雲霄浮太清乘螭龍載鶴駟音瓶隱蔽車也戴華笠奮金齡揮羽旗曳霓旌懽罔極壽億齡昭篤孝念所生歲終闕發丹情存墓冢舒哀聲遺鳥跡覺舊城被絳衣垂紫纓呼孺子告姓名由此悟感怖驚修祠宇反几筵饋

蔡中郎文集卷一

進甘香陳時傾顧馨明禋匡流祉熙帝庭祐邦國相
黔民光景福耀無垠

蔡中郎文集卷一



國家圖書館, NATIONAL CENTRAL LIBRARY, TAIWAN, R.O.C.

蔡中郎文集卷第二

國家圖書館, NATIONAL CENTRAL LIBRARY, TAIWAN, R.O.C.



郭有道林宗碑

先生名恭字林宗太原界休人也其先出自有周王季之穆有號叔者實有懿德文王咨焉建國命氏或謂之郭卽其後也先生誕膺天衷聰叡明哲孝友溫恭仁篤柔惠夫其器量弘深姿度廣大浩浩焉汪汪焉奧乎不可測已若乃砥節勵行直道正辭貞固足以幹事隱括足以矯時遂考覽六籍探綜圖緯周流華夏游集帝學收文武之將墜拯微言之未絕于時纓綬之徒紳佩之士望形表而景附聆嘉聲而響和

者猶百川之歸巨海鱗介之宗龜龍也時乃潛隱衡門收朋勤誨童蒙賴焉用祛其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈洪崖之遐跡紹巢由之絕軌翔區外以舒翼超天衢以高峙稟命不融享年四十有三以建寧二年正月乙亥卒凡我四方同好之人永懷哀悼靡所置念乃相與推先生之德以圖不朽之事僉以爲先民旣沒而德音猶存者亦賴之於紀述也今其如何而闕斯禮於是建碑表墓昭銘景行俾芳烈奮乎

百世今聞顯于無窮其詞曰於休先生明德通玄純
懿淑靈受之自天崇壯幽濬如山如淵禮樂是悅詩
書是敦匪惟撫華乃尋厥根官墻重仞允得其門懿
乎其純確乎其操洋洋搢紳言觀其高樓遲泌丘善
誘能教赫赫三事幾行其招委辭召貢保此清妙降
年不永民斯悲悼爰勒茲銘摘與光耀嗟爾來世是
則是效

文範先生陳仲弓銘

君諱寔字仲弓潁川許人也其先出自有虞氏中葉
當周之盛德有媯滿者武王配以太姬而封諸太昊

之墟是爲陳胡公春秋之末失其爵土遂以國民焉
世篤懿德令聞不顯君膺皇靈之清和受明哲之上
浴憑先民之遐迹秉玄妙之淑行投足而襲其軌施
舍而合其量夫其仁愛溫柔足以孕育羣生廣大寬
裕足以包覆無方剛毅強固足以威暴矯邪正身體
化足以陶冶世心先生有四德者故言斯可象靜斯
可効是以邦之子弟遐方後生莫不同情瞻仰由其
模範從其趣尚矣狼斯和爭訟化讓雖嚴威猛政迫
以刑戮未若先生潛導之速也其立朝事上也恭順

貞厲含章直才無顯諫以彰直不割高而引長常幹
州郡腹心之任義則進之以達道否則退之以光操
然後德立名宣蓋于當世辟司徒府納規陳謀匡弼
三事人用昭明台階允寧遷開喜長清風暢於所漸
儉節溢於監司郡政有錯爭之不從卽解綬去復辟
大尉府遷太丘長民之治情斂慾反於端懿者猶草
木之偃於翔風百卉之挺於春陽也以所執不協所
屬色斯舉矣不俟終日辟大將軍府道之行廢有分
於命乃罹密網以就禁錮潛伏不試十有八年大忌

蠲除舉賢良方正大將軍司徒並辟君曰七十有懸
車之禮況我過諸遂不應其命容止法度老而彌壯
凡所履行事類博審不可勝數略舉首目其實錄記
在乎其傳春秋八十有三中平三年八月丙子卒大
將軍三公使御屬往弔祠會葬作誄諡曰文範先生
刺史太守樹碑頌德許令以下至於國人立廟舊邑
四時蒸嘗歡哀承祀其如祖禰先生存獲重稱亡歆
血食修行於已得斯於人固上世之所罕有前哲之
所不過也孤嗣紀銜恤在疚敢錄言行終始所守乃

有二三友生咨度禮則咸曰君化道神速行于有
法施于民祀典所宗鄉人之祠非此遺孤所得專也
昔者先生甚樂茲土築室講誨精靈所寧紀順奉雅
意遂定兆域宜有銘勒表墳墓俾後生之歌詠德音
者知丘封之存斯也乃作銘曰於熙文考天授弘造
淵玄其深巍峩其高剛而無虐柔而不撓誕鋪模憲
示世作教君之誨矣民胥効矣道行斯進廢乃斯止
鮮我顯泰既多幽否含榮取辱涅而不緇德之休明
賤不爲耻超邈其猷莫與方軌

陳太丘碑

先生諱寔字仲弓潁川許昌人也含元精之和應期
運之數兼資九德總修百行於鄉黨則恂恂焉斌斌
焉善誘善導仁而愛人使夫少長咸安懷之其爲道
也用行舍藏進退可度不徼訐以于時不遷怒以臨
下四爲郡功曹五辟豫州六辟三府再辟大將軍宰
聞喜半歲太丘一年德務中庸教敦不肅政以禮成
化行有謚會遭黨事禁錮二十年樂天知命澹然自

逸交不諂上愛不黷下見幾而作不俟終日及文書
赦宥時年已七十遂隱丘山懸車告老四門備禮閑
心靜居大將軍何公司徒袁公前後招辟使人曉諭
云欲特表便可入踐常伯超補三事佩紆金紫光國
垂勳先生曰絕望已久飾巾待期而已皆遂不至弘
農楊公東海陳公每在衮職羣僚賀之皆舉手曰潁
川陳君命世絕倫大位未躋慙於文仲竊位之負故
時人高其德重於公相之位也年八十有三中平三
年八月丙子遭疾而終臨沒顧命留葬所卒時服素

棺槨財用襯喪事唯約用過乎儉羣公百僚莫不咨
嗟巖藪知名失聲揮涕大將軍弔祠錫以嘉諡曰徵
士陳君稟嶽瀆之精苞靈曜之純天不憖遺一老俾
屏我王梁崩哲萎于時靡憲縉紳儒林論德謀績諡
曰文範先生傳曰郁郁乎文哉書曰洪範九疇彝倫
攸叙文爲德表範爲士則存誨沒號不亦宜乎三公
遣令史祭以中牢刺史敬弔太守南陽曹府君命官
作誄曰赫矣陳君命世是生含光醇德爲士作程資
始旣正守終有冷奉禮終沒休矣清聲遣官屬掾吏

前後赴會刊石作銘府丞與比縣會葬荀慈明韓元
長等五百餘人總麻設位哀以送之遠近會葬千人
以上河南尹种府君臨郡追嘆功德述錄高行以爲
遠近鮮能及之重部大掾以成斯銘可謂存榮沒哀
死而不朽者也乃作銘曰峩峩崇嶽吐符降神於皇
先生抱寶懷珍如何昊穹旣喪斯文微言圯絕來者
曷聞交交黃鳥爰集于棘命不可贖哀何有極

陳太丘廟碑銘

維中平五年春三月癸未豫州刺史典以褒功述德

政之大經是以作諡封墓興於周禮衛鼎晉銘其昭
有實故太丘長潁川許昌陳寔字仲弓含聖哲之清
和盡人才之上美光明配於日月廣大資乎天地辟
四府宰三城神化著於民物形表圖於丹青巍巍乎
其不可尚也洋洋乎其不可測也儉約違時懸車致
仕徵辟交至遂不屑就春秋八十有三寢疾而終大
將軍賜諡羣后建碑國人立廟先生有二子季方元
方皆命世希有繼期特立季方盛年早亡亦圖容加
諡元方在喪毀瘁消形嘔血純孝過哀率禮不越于

時嘉異畫像郡國欽盛德之休明懿鍾鼎之碩義乃
樹碑鐫石垂世寵光詞曰於皇先生冠耀八荒闡德
之宇探道之綱繼期立表以訓四方惟亮天工羣生
之望高明允實有馥其芳載德奕世休有烈光欽慕
在人舊有憲章過牧斯州庶奉清塵棄予而邁靡瞻
靡聞嗟我懷矣曷所咨詢告哀金石式昭其勤

汝南周巨勝碑

君諱勰字巨勝陳留太守之孫光祿勳之子也君應
坤乾之淳靈繼命世之期運玄懿清朗貞厲精粹體
仁足以長人嘉德足以合禮總六經之要括河洛之
機援天心以立鈞贊幽明以揆時沉靜微密淪於無



內寬裕弘博含乎無外巨細洪纖罔不總也是以實繁於華德盈乎譽初以父任拜郎中疾去官察孝廉是時郡守梁氏外戚貴寵非其好也遂以病辭太守復察孝廉乃俯而就之以明可否然猶私存衡門講誨之樂不屑已也又委之而旋故大將軍梁冀專國作威海內從風世之雄材優逸之徒莫不委質從命而顛覆者蓋亦多矣聞君洪名前後三辟卒不降身由是搢紳歸高群公事德太尉司徒再辟三辟察賢良方正州舉孝廉皆病不就擾攘之際災青仍發聖

上詢諮師錫策命公車特徵君仰瞻天象俯察人事世路多險進非其時乃托疾杜門靜居里巷無人跡外庭生蓬蒿如此者十餘年強禦不能奪其守王爵不能滑其慮至延熹二年乃更開門延賓享宴娛樂及秋而梁氏誅滅十二月君卒然則識幾知命可觀於斯矣洋洋乎若德雖崇山千仞重淵百尺未足以喻其高究其深也夫三精垂耀處者有表爰在上世作者七人焉有該百行備九德齊光日月洞靈神明如君之至者與豈所謂天明之秀也享年五十不登

敬初生民力能行起

期考遐邇歎悼痛心矢圖乃相與建碑勒銘以旌休
美其辭曰厥初生民天賜之性有龐有醇有否有聖
伊惟周君允卜其政誕茲明德自貽哲命煥乎其文
如星之布確乎不拔如山之固追蹤先緒應期作度
潛心大猷覃思德謨遁世無悶屢辭王寮洋洋泌丘
于以逍遙茂爾童蒙是訓是教瞻彼榮寵譬諸雲霄
優哉游哉侔此弘高名振華夏光耀昆苗清風不揚
德音孔昭

彭城姜伯淮碑

先生諱肱字伯淮彭城廣人也其先出自帝胤音在
皇唐蓋與四岳共業能禮於神舜命秩宗爰封于呂
其裔呂望佐周克殷俾侯齊國姓有姜氏即其後也
高祖祖父皆豫章太守穎陰令先生既蹈先世之純
德體英妙之高姿立性純固百行修備故其平生所
能事親惟孝如大舜五十而慕友于兄弟有棠棣之
華萼音華花盛貌之度體惠理和有上德之素安靜守
約恩及嬰兒至操動信邑中化之外戶不閉治藏無
隱及其學而知之者三墳五典八索九丘俯仰占候

推步陰陽有名物定事之能獨見先覩之効然猶學而不厭誨人不倦童冠自遠方而集者蓋千餘人夫水盈而流德交而形是故德行外著洪聲遠布華夏同稱名振當世凡十辟公府九舉賢良方正公車特徵玄纁禮聘又家拜犍音堅為太守大中大夫先生盤桓育德莫之肯就不隕穫於貧賤不充詘於富貴拔乎其萃出乎其類生民之傑也年七十有七建安二年四月辛巳卒於是從遊弟子陳留申屠蟠等悲悼傷懷懼微言之欲絕感絕倫之盛事乃建碑於墓

甄述景行邈矣先生應天淑靈孝友是備上德是經弘此文藝耽怡是寧恂恂善誘童冠來誠有燁其譽有煥其聲顯顯羣公並加辟命赫赫聖皇仍獲其聘委策避國守此玄靜綽乎其裕確乎其操疇昔洪崖雙名並高嗟乎殞沒搢紳永悼依依我徒靡則靡効勒銘金石彌遠益曜

貞節先生范史雲銘

先生諱丹字史雲陳留外黃人陶唐氏之後也其在周室有士會者為晉大夫以受范邑遂以為氏漢文

景之際爰自南陽來家于成安生惠延熹二年官至
司農廷尉君則其後也君受天正性志高行潔在乎
幼弱固已藐然有烈節矣時人未之或知屈爲縣吏
亟從仕進非其好也退不可得乃託死遁去親戚莫
知其謀遂隱竄山中涉五經覽書傳尤篤易與尚書
學立道通久而後歸遊集太學知人審友苟非其類
無所容納介操所在不顧貴賤其在鄉黨也事長惟
敬養稚惟愛言行舉動斯爲楷式郡縣請召未嘗屈
節其有備禮招延虛已迓止亦爲謀奏盡其忠直以

虛士舉孝廉除郎中萊蕪長未出京師喪母行服故

事服闋

音闋止也

後還郎中君遂不從州郡之政凡其事

君過則弼之闕則補之通清夷之路塞邪枉之門舉
善不拘階次黜惡不畏強禦其事繁多不可詳載雅
性謙儉體勤能苦不樂假借與從事荷負徒行人不
堪勞君不勝其逸辟太尉府俄而冠帶或以群黨見
嫉時政用受禁錮君惟其罪閉門靜居九族中表莫
見其面晚節禁寬困於屢空而性多檢括不治產業
以爲卜筮之術得因吉凶道治民情以受薄償且無

卷七
咎累乃鬻卦于梁宋之域好事者覺之應時輒去禁
既蠲除太尉張公司徒崔公前後四辟皆不就仕不
爲祿故不牽於位謀不苟合故特立於時是則君之
所以立節明行亦其所以後時失途也年七十有四
中平二年四月卒太尉張公兖州劉君陳留太守淳
于君外黃令劉君僉有休命使諸儒叅按典禮作誄
著謚曰貞節先生昭其功行錄記所履謀於耆舊刊
石樹銘光示來世於顯貞節天授懿度誕茲明哲允
迪德譽如淵之清如玉之素溷音混濁也世之不濁

涅之不汗用行思忠舍藏思固伯夷是師史鮪是慕
榮貧安賤不恡窮迂甘死善道遺名之故身沒譽存
休聲載路



國家圖書館, NATIONAL CENTRAL LIBRARY, TAIWAN, R.O.C.

CONSTITUTION

玄文先生李子材銘

玄文先生名休字子材南陽宛人也其祖李伯陽周柱下史覲衰世而遁焉其後雄俊豪傑往往崛起自戰國及漢名臣繼踵支胄散逸其遷于宛尚矣王莽竊位漢祚中移考翼佐世祖匡復郊廟錫封茅土卿相牧守于時相逐休少以好學游心典謨既綜七經又精群緯鈞深極奧窮覽妙旨居則玩其辭動則察

其變雲物不顯必考其占故能獨見前識以先神意若古今常難疑義錯繆前人所希論後學所不覽休盡剖判剝散幽暗靡不昭爛猶發憤於目所不覩體所不閑遂登東岳觀百王遺風君容闕里以協禮衷退而講誨童冠仰焉傳傳音轉如也郡署五官掾功曹司空胡公顯以儒譽特進大鴻臚仍優禮固請秉讓執虛辭此三命不爲利回不爲義疚臨寵審已不動其守可謂純潔皓素綽有餘裕者已其於鄉黨細行敦睦九族篤信交友不可得而詳也初娶配出後

于茲先生之行方起

配未字年既五十苗胤不嗣以永壽二年夏五月乙未卒凡其親昭朋徒相與大會而葬之鼎俎之禮節文曲備時令戴君臨喪命謚郡遣丞掾音院公府掾吏也冠蓋咸屆既定而後罷焉於是故好朋舊僉以仲尼既沒文不在茲韞櫝美玉喪莫賈之求而無繼悽爾求思乃刊斯石懿德是不吁茲先生秉德恭勤天啓哲心其學孔純經緯是綜雅麗是分行已守道匪禮不遵處約不戚聞寵不欣榮不能華威不能震天淑厥命以讓以仁有惠云載惟邦之珍按典考謚謚以玄

文身沒名彰配黔音度黑也作隣遺譽罔極丕昭億年
嗚呼哀哉

處士園叔則銘

伊漢二十有一世處士有園音混廝也鼠所居也典字叔則者夫其生也天真淑性清理條暢精微周密包括道要致思無形深總曆部織入藝文藻分葩列如春之榮守根據窮不虛其聲偉德若茲惟世之英乃遂隱身高數稼穡孔勤童蒙來求彪之用文不義富貴譬諸浮雲州郡禮招休命交集徒加名位而已莫之能起

卷八

蔡中郎集卷八
也博士徵舉至孝耻已處而復出若有初而無終潔
耿介於丘園慕七人之遺風年七十有五建寧二年
六月卒臨沒顧命曰知我者其蔡邕乃爲銘載書休
美俾來世昆裔永有諷誦於先生之德其辭曰民之
齊敏卓時挺生思心精叡綜物通靈術有玄妙于時
游情聞道睹異惕然若鶩守死善操與世無營渾其
若濁徐然後清綽其若煥終其益貞有恒實難獨秉
其經嗟爾來世是瞻是聽

蔡中郎文集卷第二



蔡中郎文集卷第三

國家圖書館 NATIONAL CENTRAL LIBRARY, TAIWAN, R.O.C.



司空楊公碑

公諱秉字叔節弘農華陰人其先蓋周武王之穆晉
唐叔之后也末葉以支子食邑于楊因氏焉周室既
微裔胄無緒暨漢興烈祖楊喜佐命征伐封赤泉侯
嗣子業紱冕相繼公之不考以忠蹇亮弼輔孝安登
司徒太尉公承夙緒世篤儒教以歐陽尚書京氏易
誨授四方學者自遠而至蓋踰三千初辟司空舉高
第拜侍御史遷豫州兗州刺史任城相徵入勸講拜
太中大夫左中郎將尚書出補右扶風留拜光祿大
夫遭權嬖貴盛六年守靜外戚火燔乃遷太僕太卿

公事絀位浹辰之間俾位河南憤疾豪強見邁姦黨
用嬰疾廢起家復拜太常遂陟三司沙汰虛冗料簡
貞實抽援表達與之同蘭芳任鼎重從駕南巡爲朝
碩德然知權過於寵私富侔國大臣苛察望變復還
條表以聞啓導上怒其時所免州牧郡守五十餘人
饗戾是黜英才是列善否有章京夏清肅在位七載
年七十有四延熹八年五月丙戌薨朝廷惜焉寵賜
有加公自奉嚴敕動遵禮度量材授任當官而行不
爲義絀疾是苛政益固其守厨無宿肉器不鏤雕夙

喪嬪儷妾不嬖御可謂以身無過之地正直清儉
備者矣昔仲尼嘗垂三戒而公免焉故能匡朝盡直
獻可去奸忠侔前後聲塞宇宙非黃中純白窮達一
致其惡能立功立事敷聞于下昭升于上若茲巍巍
者乎於是門人學徒相與刊石樹碑表勒鴻勳讚懿
德傳億年於戲公唯嶽靈天挺德翼至神氣綢緼仁
哲生應台任作邦楨帝欽亮訪典刑道不惑乞有成
光遐邇穆其清

司空臨晉侯楊公碑

皇帝遣中謁者陳遂侍御史馬助持節送柩陳遵桓
典蘭臺令史十人將羽林騎鉦車介士前後鼓吹以
驃騎將軍官屬及司空法駕與公卿尚書三臺以下
葬我文烈侯三年九月甲申小祥會如初四年九月
戊申大祥公卿尚書三臺以下會如小祥之禮公之
祖納忠於前朝以罹艱禍父隱約蟄瘁治家師導唯
儉之尚公生值歟徧資賄屢空手執勤役遠涉道里
以修經術險阻艱難曷所不嘗特以其靜則貞一審
固動則不違則度合口容覆載無競伊人謀無不忠言

無不信自在弱冠布衣之中固已流芳名著茂實公
孫同倫莫能齊焉者矣州郡禮招莫之能屈委百里
位辟公車令自侍御史侍中已往道爲帝師德爲世
表體尊名重階級彌崇而公處以恭遜行以固慎德
大而心小居高而志降夫驕吝之釁周公其猶病諸
而公脫然以爲行首不以泰乎及其所以匡輔本朝
忠言嘉謀造膝危辭當事而行言從計納亦不敢宣
密誠潛功貽于帝躬家無遺草論者不見嗟乎誠爲
達事君之體得人臣之上儀者已公素不貴歸非不

樂引美故雖彷彿猶不敢載以順公之雅初受封自以功不副賞前後固辭章凡十上憂愴悄悄形于容色雖不克從情旨昭顯晚節爲廷尉公曰昔在三后成功惟殷于民而臯陶不與焉蓋吝之也及爲特進又曰唯漢重臣中興以來克稱斯位者其唯高密元侯乎吾何德以堪諸寢疾顧命無辭要言約戒忠儉而已孤彪銜恤永思綴輯所履以贊銘之銘曰赫赫烈侯卓爾超倫於唯楊公乃華降神故能明哲德亞聖人受茲介福位極人臣包羅五典本道根真爲國

之師誨上經文頻歷鄉校五登鼎鉉建名著忠確越

前賢攘災興化蟲

音謀食
苗虫

蟹

音賊食禾
節虫也

不臻風雨以

時屢獲有年三葉宰相應祚于天臨晉是侯子子孫孫億兆不窮如山之堅四時潔祀以承所尊祀事孔明奉亡如存馥馥芬芬用慰顯魂

漢太尉楊公碑

公諱賜字伯猷弘農華陰人姬姓之國有楊侯者公其後也其在漢室赤泉侯佐高丞相翼宣咸以盛德光于前朝祖司徒考太尉繼跡宰司咸有助烈公承家崇軌受天醇素欽承奉構閑于伐柯烈風維變不易其趣文藝典籍尋道入奧操清行朗潛晦幽閒不荅州郡之命辟大將軍府不得已而應之遷陳倉令

按宗本雜兩字明本作
復字今本作隨字
字玄國月馬牛化

公乃因是行退居廬公車特徵以病辭司空舉高第
拜侍中越騎校尉帝篤先業將問故訓公以羣公之
舉進授尚書于禁中遷少府光祿勳敬揆百事莫不
時序庶尹知恤閭闔推清列作司空地平天成陰陽
不忒公遂身避託疾告退又以光祿大夫受命司徒
敬敷五品宣洽人倫燮和化理股肱耳目之任靡不
克明及至太尉四時順動三光耀潤羣生豐遂太和
交薄三作六卿五蹈三階受爵開國應位特進非盛
德休功假于天人孰能該備寵榮兼包令錫如公之

至者乎公體資明哲長於知見凡所辟選升諸帝朝
者莫非瑰才逸秀并參儲佐惟我下流二三小臣穢
損清風愧于前人乃糾合同寮各述所審紀公勲績
刊石立銘以慰永懷銘曰天降純嘏古篤生柔嘉俾
胤祖考光輔國家三葉在服帝載用和粵暨我公允
執丕貞在棟伊隆于鼎斯寧德被宇宙華夏以清受
茲介福履祚孔成爲邑河渭衮冕紱珽音叔大圭長三尺以
佐天子祇事三靈不顯伊德萬邦作程爰銘爰贊式
昭懿聲

文烈侯楊公碑

公諱賜字伯猷兼通五典周覽篇籍以爲尚書帝王之要政有國之大本也是以三葉相承研其精義五代之微言王政之約綱罔不尋其端源究其條貫凜乎其見聖人之情旨也蓋以蹈騰餘蹤思高游夏初潛山澤授誨童冠後生賴以發袪蒙蔽文其材素者蓋不可勝數乃由宰府遂作帝臣于時聖幼將入學羣公以溫故知新德宜師保乃以越騎校尉援于光上之內帝坐已北面以納大誨其教人善誘則恂恂

焉罔不伸也引情致喻則闇闇焉罔不釋也迄用有成緝熙光明惟帝念功六在九卿二事勛假皇天澤充區域疆土建封申增戶邑人臣之極位兼而有之然處豐益約九命滋恭可謂高朗今終有始有卒者已於是門生大將軍何進等瞻仰沫泗公喪之禮糾合朋徒稽諸典制僉以爲匡弼之功政事之實詔策之文則史臣志其詳若夫道術之美授之方策則是門人二三小子所特貫綜敢竭不才譔錄所審言于碑乃申頌曰巍巍聖猷匪師不昭士子困蒙匪師不

教於皇文父邈哉伊超如王之固如嶽之喬鑄之斯
堅仰之彌高示我顯德授我無隱正席傳道承帝之
問誨茲一人萬邦作順微微我徒實賴遺訓文武作
式元勛既奮光啓爵土垂統末胤存榮亡哀沒而不
泯

司空文烈侯楊公碑

曰漢有國師司空文烈侯楊公公惟司徒之孫太尉
公之胤子皇祖考以懿德胥及肄勤式建休勲啓洪
範公祇服弘業克不堂構小乃不敢不慎大亦不敢

不戒用罔有擇言失行在於其躬泊在辟舉先志載
言罔不攸該乃自宰臣以從王事立功不有用辭其
祿逮作御史允執國憲納于侍中在帝左右爰董武
事王師孔閑羣公以舊德碩儒道通術明宜建師保
延入華光侍宴露寢敷典誥之精旨達聖王之聰獻
帝以機密齊粟常伯劇任鮮克知臧以釐其采命公
再作少府俾率其屬以熙庶績天地作險國家丕承
軍門祛禁式遏寇虐命公再作光祿亦總其熊羆之
士不貳心之臣保乂帝家巖巖大理惟制民命命公

作廷尉惟刑之恤旁施四方惟明折獄赦罪于憲之中亦惟三禮六樂國之元幹命公作太常明德惟馨八音克諧神人以和永世豐年溥天率土而衆莫外命公作司空公唯戢之翊明其政時惟休哉惟天陰騭下民彞倫所由順序命公作司徒而敬敷五教以親百姓父義母慈兄友弟恭子孝時惟休哉昭孝於辟雍命公作三老帝躬以祗敬遵有虞於上庠茫茫大運垂光烈曜命公作太尉璇璣運周七精循軌時惟休哉帝欲宣力于四方公則翼之辟道或違公則

彌之虔恭夙夜不敢荒寧用對揚天子丕顯休命天子大簡其勲用授爵賜封侯于臨晉功成化洽景命有傾帝乃震慟執書以泣命于左中郎將郭儀作策賜公驃騎將軍臨晉侯印綬兼號特進諡以文烈寵命畢備而後卽世肆其孤彪敢儀古式昭銘景烈銘曰天鑒有漢誕生元輔世作世事勛在王府乃及伊公克光前矩悉心畢力胤其祖武化洽羣心澤漫綿宇帝曰文烈朕嘉君功爲邑河渭建茲土封申備九錫以祚其庸位此特進于異羣公昔在申呂匡佐周

宣崧高作頌大雅揚言今我文烈帝載用熙參光日月比功四時身歿名存永世慕思

琅琊王傅蔡公碑

君諱朗字仲明蓋倉頡音歇詩傳云飛而上曰頡之精胤姬稷之末胄也昔叔度文王之昭建侯于蔡以國氏焉迄于平襄周祚微缺王室遂卑齊晉交爭強楚侵陵昭侯徙于州來公族分遷氏家于園奕葉載德常歷官尹

以逮于茲君雅操明允威厲不猛履孝悌之性懷文藝之才包洞典籍刊摘沉秘知幾達要通含神契既討三五之術又采二南之業以魯詩教授生徒雲集莫不自遠並至栖遲不易其志簞食曲肱不改其樂心棲清虛之域行在玉石之間是以德行儒林智周當代四岳稱名帝曰予聞元和元年徵拜博士舒演奧秘贊理闕文所立卓爾度躡雲蹤其選士也抑頑錯枉進聖擢偉極遺逸於九臯揚明德於側陋拔茅以彙幽滯用濟加以清敏廣平好是正直規誨之策

日諫王庭忠讜著烈今聞流行聖朝以藩國貴胄先
帝遺體或以繼絕襲位正於阿保未洽雅訓驕盈僭
差或蹈憲理非弘直碩儒莫能匡弼蔡君審行修德
進退可度遷河間中尉琅琊王傅乃從經術之方示
以棐諶之威率禮莫違其國用靖雖安國之輔梁孝
仲舒之相江都靡以加焉勳績旣盛帝簡其功將授
上位遷于紫宮賦壽不永遘此疾凶年五十八永興
六年夏卒嗚呼哀哉凡百君子咨痛罔極殷懷傷悼
含涕流惻如何昊天喪我師則爰勒斯銘式昭其

天敏明哲於赫我君含弘光大玄覽孔真潛樂教思
韞玉衡門雲龍感應養徒三千珠藏外耀鶴鳴聞天
若時徵庸登祚王臣綜彼前疑定此典文叅佐七德
俾相大藩身沒稱顯永遺令勲表行揚名垂示後昆

劉鎮南碑

君諱表字景升山陽高平人也君應期挺生瑰偉大
度黃中通理博物多識爲郡功曹千里稱平上計吏
辟大將軍府遷北軍中侯在位十旬以賢能特選拜
刺史荊州永平元年十一月到官清風先驅莫不震
肅奸宄音鬼奸改節不仁引頸君乃頒愷悌流惠和
慕唐叔之野棠思王遵之驅印賦政造次德化宣行

俄而漢室大亂禍起蕭牆賊臣專政英雄虎爭縣邑
閭里奸宄煙發州縣殘破天下土崩四海大壞當是
時也雖有孔翟之聖賢育貴之勇勢無所措其智力
君遇險而建略遭難而發權招命英俊爰得驍雄謀
臣武將合策明計出次北境遷屯漢陰因滄浪以爲
隍卽春葉以爲墉南撫衡陽東綏潯沂西靖巫山保
又四疆選才任良式序賢能簡將命卒綦布星陳備
要塞之處戍八方之邊勸穡務農以田以漁稌粟紅
腐年穀豐夥江湖之中無劫掠之寇沅湘之間無攘

竊之民郡守今長冠帶章服府寺亭鄉崇棟高門皆如其舊當世知名輻輳而至四方極負自遠若歸窮山幽谷於是爲邦百工集趣機巧萬端器械變通利民無窮隣邦懷慕交揚益州盡遣驛使冠蓋相望下民有康哉之歌群后有歸功之緒莫匪嘉績克厭帝心卽遷州牧又遷安南將軍領州如故于時諸州或失土流播或水潦没害人民死喪百遺二三而君保完萬里至于滄海聖朝欽亮析圭授土遣御史中丞鍾繇卽拜鎮南將軍錫鼓吹大車策命褒崇謂之伯

父置長史司馬從事中郎開府辟召儀如三公上復遣左中郎將祝耽授節以增威重并督交揚二州委以東南惟君所裁雖周召授分陝之任不遠過也交州殊遠王塗未夷夷民歸附大小受命其郡縣長吏有缺皆來請之君權爲選置以安荒裔輒別上聞齊桓遷邢封衛之義也武功旣亢廣開靡泮設俎豆陳壘爨親行鄉射躋彼公堂篤志好學吏民子弟受學之徒蓋以千計洪生巨儒朝夕講誨閭閻如也雖洙泗之間學者所集方之無異也深愍末學遠本離實

乃令諸儒改定五經章句刪刻

音產削也

浮辭芟

音杉伐莫也

除煩重又求遺書寫還新者留其故本於是古典畢集充于州閭及延見武將文吏教令溫雅禮接優隆言不及軍旅之事辭不逮官曹之文上論三墳八索之典下陳世教忠義之方內剛如秋霜外柔如春陽不伐其善不有其庸如彼川流每往滋通可謂道理不才命世希有者已仁者壽宜享期考昊天不弔年六十有七建安十三年八月遘疾殞薨耕夫罷耜織女投杼老幼哀號若喪父母時道路艱險留墳州土

轉移歸葬父勉其子妻勉其夫欲共扶送至干鄉里南陽太守樂鄉亭侯旻思等言及志在州里者各發卒具送靈柩之資子授徵拜五官中郎將乃疏上請歸本縣葬見聽許太和二年葬於先塋於是臣故忻洽咸以爲申伯韓侯之翼周室受輅車乘馬玄裘赤烏之賜詩人詠功列于大雅至今不朽况乎將軍牧二州歷二紀功載王府賜命優備賴而生者毓子孕孫能不歌嘆乃作頌曰猗歟將軍膺期挺生桓桓其武溫溫其仁初幹千里允顯使臣幕府禮命集于北

軍督齊禁旅如罷如熊眷然南顧綏我荆衡將軍之
來民安物豐江湖交壤刑清國興菽芾甘棠召伯聽
訟周人勿剗我賴其楨欲報之德胡不億年如何矧
逝孤棄萬民鐫勒墓石以紀洪勲昭示來世垂芳後
昆

蔡中郎文集卷第三

國家圖書館, NATIONAL CENTRAL LIBRARY, TAIWAN, R.O.C.

蔡中郎文集卷第四

國家圖書館, NATIONAL CENTRAL LIBRARY, TAIWAN, R.O.C.



太傅文恭侯胡公碑

公諱廣字伯始交趾都尉之元子也公應天淑靈履性貞固九德咸修百行畢備遭家不造童而夙孤上奉繼親下慈弱弟崎嶇儉約之中以盡孝友之道及至入學從訓歷觀古今生而知之聞一覩十兼以周覽六經博總羣議旁貫憲法通識國典年二十七察孝廉除郎中尚書侍郎尚書左丞尚書僕射幹練後

事綢繆樞極忠亮唯允簡于帝心智略周密冠于庶事遷濟陰太守其爲政也寬裕足以容衆和柔足以安物剛毅足以威暴體仁足以勸俗故禁不用刑勸不用賞其下望之如日月從之如影響思不可忘度不可革遺愛結於人心超無窮而垂則徵拜大司農遂作司農遷太尉以援立之功封安樂鄉侯錄尚書事稱疾屢辭策賜就第復拜司空功成身退俾位特進又拜太尉復以特進致命休神又拜太尉遜位歸爵旋于舊土徵拜太中大夫尚書令太僕太常司徒

永康之初以定策元功復封前邑錄尚書事疾病就第又授太傅入叅機衡五蹈九列七統三事諒闇之際三據冢宰和神人於宗伯理水土於下台訓五品於司徒耀三辰于上階光弼六世歷載三十自漢興以來鼎臣元輔耄耋老成勲被萬方與祿終始未有若公者焉春秋八十二建寧五年三月壬戌薨于位天子悼惜羣后傷懷詔五官中郎將任崇奉冊贈以太傅安樂鄉侯印綬拜室家子一人郎中賜東園秘器賜絲帛含歛之備中謁者董詡弔祠護喪錢布賻

賜率禮有加賜諡曰文恭昭顯行迹四月丁酉葬于洛陽塋故吏濟陰池喜感公之義率慕黃鳥之哀推尋雅意彷徨舊土休績丕烈宜宣于此乃樹石作頌用揚德音詞曰於皇上德懿鑠孔純大孝昭備思順履信膺期命世保茲舊門淵泉休茂彪炳其文爰贊天機翼翼唯恭夙夜出維維維龍賦政于外神化玄通普被汝南越用熙雍帝曰休哉命公三事乃耀柔嘉式是百司股肱元首庶績咸治二氣燮雍五徵來備勲格皇天澤洽后土封建南藩受茲介祐王藻

在冕毳服艾輔輅車雕駟四牡修扈贊事上帝祇祀
宗祖陟降盈虧與時消息旣明且哲保身遺則同軌
日奭光充區域生榮死哀流統罔極



胡公碑銘

公諱廣字伯始南郡華容人也其先自媯姓建國南
土曰胡子春秋書焉列于諸侯公其後也考以德行
純懿官至交趾都尉公寬裕仁愛履載博大研道知
幾窮理盡性凡聖哲之遺教文武之未墜罔有不綜
年二十七察孝廉除郎中尚書侍郎左丞尚書僕射
內正機衡允釐其職文敏暢乎庶事密靜周乎樞機
帝用嘉之遷濟陰太守公乃布愷悌宣柔嘉通神化

導靈和揚惠風以養真激清流以盪邪取忠肅於不
言消奸宄於爪牙是以君子勤禮小人知耻鞠推息
於官曹刑戮廢於朝市餘貨委於路衢餘種棲于畝
畝遷汝南太守增修前業考績既明入作司農實掌
金穀之淵藪和均關石王府以充遂作司徒昭敷五
教進作太尉宣暢渾元人倫輯睦日月重光遭國不
造帝祚無主援立孝桓以紹宗緒用首謀定策封安
樂鄉侯戶邑之數加于羣公入錄機事聽納總已致
位就第復拜司空敷土導川俾順其性功遂身退告

疾固辭乃爲特進爰以休息又拜太常典司三禮敬
恭禋祀神明嘉歆永世豐年聿懷多福復拜太尉尋
申前業又以特進道遙致位又拜太常邁疾不夷遂
位歸爵遷於舊都徵拜太中大夫延和末年聖主革
正幸臣誅斃引公爲尚書令以二千石居官委以閫
外之事釐改度量以新國家弘綱旣整袞闕以補乃
拜太僕車正馬閑六駟習馴遷太常司徒成宗晏駕
推建聖嗣復封故邑與叅機密寢疾告退復拜太傅
錄尚書事于時春秋高矣繼親在堂朝夕定省不違

子道旁無几杖言不稱老居喪致哀率禮不越其時
下荅賓雖幼賤降等禮從謙厚尊而彌恭勞思萬機
身勤心苦雖老萊子嬰兒其服方叔克壯其猷公且
納于台屋正考父俯而循禮曷以尚茲夫蒸蒸至孝
德本也體和履忠行極也博聞周覽上通也勤勞王
家茂功也用能十登三事篤受介祉亮皇業於六王
嘉丕績於九有窮生人之光寵享黃耇之遐紀昭明
德以保身與福祿乎終始年八十有二建寧五年春
壬戌薨于位天子悼痛贈策賜誄諡曰文恭如前傳

之儀而有加焉禮也故吏司徒許詡等相與欽慕崧
高蒸民之作取言時計功之則論集行跡銘諸琬琰
其詞曰伊漢元輔時惟文恭聰明獻哲思心瘁容畢
力天機帝休其庸賦政于外有邈其蹤進作卿士粵
登上公百揆時序五典克從萬邦黎獻共唯時雍勲
烈旣建爵土乃封七被三事再作特進弘唯幼沖作
傳以訓赫赫猗公邦家之鎮澤被華夏遺愛不倫日
與月與齊光並運存榮亡顯沒而不泯



太傅胡公碑

維漢二十有一世建寧五年春三月既生魄八日壬戌太傅安樂鄉侯胡公薨越若來四月辛酉葬我君文恭侯於是掾太原王允鴈門畢整屬扶風曾宙潁川殷歷等僉謂公之德也柔而不犯威而不猛文而不華實而不朴靜而不滯動而不踈總天地之中和

覽生民之上操聰明膚敏兼質先覺涉觀憲法契關文學睹臯陶之闡闡採孔子之房奧然而約之以禮守之以恭寬之以納衆汎愛多容其誘人也恂恂焉怡怡焉能使蒙惑開析僞戾優順逸惰勤信及其創基發跡機密聖朝其知其能夙夜惟寅以允帝命是以頻繁機極三升而不出焉乃還譚其舊章彌綸古訓貫萬品研精微用補前臣之所闕十年而無愆強記同乎富平周慎逸於博士偶山甫乎喉舌疋虞龍而納言唯帝命公以二郡其爲政也導人以德帥物

以已敦以忠肅勵以知耻人悅其化天樂其和士相
勉於公朝民勸行於私家微纏縈而靡係鞭朴棄而
無加洋洋乎若德宣治嚴以爲威寬以爲福而已哉
五作卿士七蹈相位太僕司農太傅司空各一司徒
特進各二太常太尉各三光輔六世歷載三十有餘
其致治也通水泉於潤下蕃后土於稼穡訓五品於
羣黎崇人物於區域耀三辰於渾元協大中於皇極
傳聖德於幼冲率且奠於舊職譬彼四時功成則退
在盈思中升隆以順建封域於南土踐殊號於特進

榮祚統業垂乎來胤公自二郡及登相位凡所辟用
遂至大位者故司徒中山祝括其餘登堂閣據賦政
策勲樹功流化者蓋不可勝載唯我末臣頑蔽無聞
仰慕羣賢惡乎可及自公寢疾至于薨斃參與嘗禱
列位喪位雖庶物戮力不愆于禮進睹墳塋几筵靈
設退顧堂無音儀永闕感悼傷懷心肝若割相與累
次德行撰舉功勲刊之于碑用慰哀思其詞曰煥文
德伊朝后應期運作漢輔喜中興膏民庶澤洪淳亶
攸序亘地區充天宇躡高遠踵遐武揚景烈垂不朽

仰邃古耀昆後

胡太傅祠前銘

天鑒有漢山嶽降靈於肅文恭應期誕生好是
柔惠且貞爰在初服皇嘉其聲納于機密機密惟清
守于三邦三邦事寧越尹三卿百揆時序七受帝命
作此元輔左右六世靖綏土宇蠢彼羣生保賴亶敘
紹跡龍夷繼軌山甫遭國不造仍世短祚援立聖嗣
得公之謨帝曰文恭朕嘉君功爲邑安樂以祐其庸
登位特進于異羣公休命丕顯光寵克章公拜稽首
是對是揚藹藹惟公民斯攸望春秋旣暮倏爾乃喪
不勅是遺俾屏於皇新廟奕奕于以蒸嘗子子孫孫

承嗣無疆

漢交趾都尉胡夫人黃氏神誥

夫人江陵黃氏之季女字曰列羸其先出自伯翳別封于黃以國氏焉高祖父汝南太守曾祖父延城大尹祖父番禺令父以主簿嘗證太守事奉明君以立臣節漢南之士以爲美談初都尉君娶于故豫州刺史卽黃君之姊生太傅安樂侯廣及卷令康而卒繼室以夫人生童紀未齒而夭夫人懷聖善之姿韜慈母之仁撫育二孤導以義方思齊先姑神罔時恫故能迄用有成誕膺繁祉廣歷五卿七公再封之祿康亦由孝廉宰牧二城九鼎之義夫人是享爰暨稚孫

更仕三宮或典百里或作虎臣銀艾貂蟬近侍顯尊
受茲介福于我夫人自郡尉仕于京師及廣兄弟式
叙漢朝夫人居京師六十有餘載其乘輅執贄朝皇
后採柔桑于蚕宮手三盆于繭館者蓋三十年上有
帝室寵光之休下有堂宇斤斤之祚心耽其榮體安
其遠圖長慮慮用遺舊居欲留此焉康寧之時亟以
爲言太夫人年九十一建寧二年薨于太傅府是月
辛酉公之季子陳留太守碩卒于洛陽左池里舍公
銜哀悼祇慎其屬遵奉遺意不敢失墜乃俾元孫顯

咨度群儒以考其衷僉曰昔帝舜沒於蒼梧殯於虞
郊二妃薨於江湘不卽兆于九疑延陵季子寔惟吳
人長子道終卜葬嬴博夫遭時而制不遠遷徙魂氣
所之不繫丘壠帝舜以之神罔時怨季札以之仲尼
嘉焉鑒帝籍之高論綜精靈之幽情稽先人之遐迹
順母氏之所寧茲事體通而義同允不可替於是公
乃爲辭昭告先考然後卜定宅兆龜筮悉從遂營窀
窆窀音衡厚也窀音父
夜也窀窆尤長夜也之事舉封樹之禮十月旣望
粵翌日巳酉葬我夫人黃氏及陳留太守碩于此高

原雒陽東界關亭之阿天子使中常侍謁者李納弔
且送葬持賻錢二十萬布二百疋再以中牢祠群后
畢會榮哀孔備于時濟陽故吏舊民中常侍勾陽于
肅等二十三人思應慕化推本議銘著斯碑石俾諸
昆裔瞻仰以知禮之用是爲神語乃申頌曰於穆夫
人家邦之緩昔在嬴代黃國氏建至于近祖亦降于
漢天祚明德福祿流衍旣作母儀履信思順登壽耄
耄用永蕃變子孫以仁追稽先典厝茲洛濱齊跡湘
靈配名古人休矣耀光千億斯年

太傅安樂侯胡公夫人靈表

夫人編縣舊族章氏之長女也字曰顯章令儀小心
秉操塞淵仁孝婉順率禮無遺體季蘭之姿蹈思齊
之跡永初二年年十有五爰初來嫁誕成家道仰奉
慈姑竭歡致敬俯誨膝下化導周悉至德修於幾微
徽音暢於神明故能叅姪妣之功兼生人之榮朝春
路寢贊桑蚕宮光寵有祭祭服有琬音充琬耳也前後奉
斯禮者三十餘載夫人生五男長曰整伯齊次曰千
億叔韓次曰寧穉威次曰碩季獻伯仲各未加冠遭

厲氣同時天折叔上郡孝廉季更歷州寧舉茂才葉
 令京令為議郎季以高第為侍御史諫議大夫侍中
 虎賁中郎將陳留太守皆早即世夫人哀悼劬悴由
 是被疾遭太夫人憂篤年七十七建寧三年薨夫人
 之存也契闊中饋婉戀供養依生奉仁紹述雅意其
 閏月附于太夫人窀穸于茲地魂而有靈欽明定省
 神心欣焉其實寧之元女金盈追慕永思音忡悽也
 罔極遂及斯表鐫著堅珉音民石似玉也頌曰悲母氏之不
 永懷殷恤以摧傷惟子道之無窮惜聞誨之未央

黃耆以期願胡委我以夙喪恒思心以激切亦割肝
 以絕腸昔先聖之遺辭言仁者其壽長嗟母氏之憂
 患體愷悌以慈良失延年之報祐獨何棄於穹蒼日
 月忽以將暮抱長結以含愁尋修念於在昔原疾病
 之所由遭元子之弱天心傷悴以自憂暨叔季之殞
 終哀情結以彌綢皇姑沒而中感遂大漸兮速流疾
 燄燄而日邁氣微微以長浮銷精魂以遐翔曾不可
 乎援留爾乃順旨於冥冥繼存意於不違爰附靈於
 皇姑尚魂魄之有依潛幽室之黯漠惜昭明之景輝

卷八
一往超以末及傾徂邈其彌遲顧新廟以累欷伏几
筵而增悲嗟既逝之益遠眇悠悠而莫追



議郎胡公夫人哀讚

議郎夫人趙氏字曰永姜允有令德秉心塞淵舒詳
閒雅儀節孔備女師四典窈窕德象罔不習熟以供
婦道議郎早世檢誨幼孤義方以導其性中禁以閑
其情孤顯儉節用免咎誨少辟侍中襲先公之爵以
議郎出爲濟陰太守是時夫人寢疾未薨而國家方
有榮陽寇賊震驚帝師簡選州辟授任進衛不得辭
王命親醫藥夫人乃自矜精稟氣力俛起若愈以勸
遣顯到官月餘所疾暴盛春秋五十八中平四年薨
于京師顯有剖符之寄偪於國典疾篤不得顧親增

感氣絕不能自宥慎終之事闕焉求廢雖不毀以隨
沒亦困悴而傷懷知我如此不如勿生號咷告哀以
乞骸骨踰年然後獲聽追惟考君存時之命迎棺舊
土同穴此城孤心摧割靡所底念仰瞻二親或有神
詰靈表之文敢曰亮開叙我憂痛作哀讚書之于碑
愍予小子夙罹孔艱嚴考殞沒我在韶年母氏鞠育
載矜載憐殷斯勤斯慈愛備存匪惟驕之範我軌度
教誨嚴肅昭示好惡俾我克類畏威忌怒用免咎悔
踐繼先祖卽爵其上二將是臨與帝剖符守于濟陰

夫人寢疾榮此寵休疾用歡痊翊日斯瘳將征將邁
從養陶丘景命徂逝不愍少留疾大漸以危亟兮精
微微而浸衰逼王職於憲典兮子孫忽以替違目不
臨此氣絕兮手不親夫含飯陳衣衾而不省兮合綆
棺而不見昔予考之卽世兮安宅兆于舊邦依存意
以奉亡兮遷靈柩而同來考妣痛以慄兮離乖神柩
集而移兮增哀黃壚密而無間兮出入閭其無門昇
音于兩人 柩在茲兮不知魂景之所存悼孤衷之不
共舉也 遂兮恩情憐以傷肝幽情淪於后坤兮精哀達乎昊



蔡中郎文集卷第四

國家圖書館, NATIONAL CENTRAL LIBRARY, TAIWAN, R.O.C.



蔡中郎集卷第五

漢 陳留蔡邕著

明新安汪士賢校

光武濟陽宮碑

惟漢再受命曰世祖光武皇帝考南頓君初為濟陽
令濟陽有武帝行過宮常封閉帝將生考以令舍下
濕開宮後殿居之建平元年十二月甲子夜帝生時
有赤光室中皆明使卜者王長卜之長曰此善事不
可言歲有嘉禾一莖生九穗長於凡禾因為尊諱王

室中微哀平短祚姦臣王莽偷有神器十有八年罪成惡熟天人致誅帝乃龍見白水淵躍昆上破前隊之衆彌二公之師牧兵略地經營河朔戮力戎功翼戴更始義不卽命帝位闕焉於是羣公諸將據河洛之文叶符瑞之珍僉曰曆數在帝踐祚允宜乃以建武元年六月乙未卽位鄗縣之陽九域之陌祀漢配天不失舊物享國三十六年方內又安蠻夷率服巡狩泰山禪梁父皇代之遐迹帝者之上儀罔不畢舉道德餘慶延于無窮先民有言樂樂其所自生而禮

不忘其本是以虞稱媯

音歸水名 汭音芮水名

姬美周原皇

天乃眷神宮實始于此厥跡邈哉所謂神麗顯融越不可尚小臣河南尹鞏璋先祖銀艾封侯歷世卿尹受漢厚恩瑋以商箕餘烈郡舉孝廉爲大官承來在濟陽願見神宮追惟桑梓褒述之義用敢作頌頌曰赫矣炎光爰耀其輝篤生聖皇二漢之微稽度乾則誕育靈姿黃孽作慝篡握天機帝赫斯怒爰整其師應期潛見扶陽而飛禍亂克定羣凶殄夷匡復帝載萬國以綏廵于四嶽展義省方登封降禪升于中皇

爰茲初基天命孔彰子子孫孫保之無疆

蔡中郎集卷第七

漢 陳留蔡邕著

明新安汪士賢校

太尉汝南李公碑

公諱咸字元卓汝南西平人蓋秦將李信之後孝武
大將軍廣之胄也枝流葉布家于茲土文武繼踵世
爲著姓曾祖父江夏太守伯父東郡太守公受純懿
之資萃忠清之節夙夜嚴慄孝配大舜敦詩書而悅
禮樂觀天文而察地理動與神合契抗流行操邁伯

夷德追孔父舉孝廉除郎中光祿茂才遷衛國公相
受高密令勤恤民隱政成功簡遷徐州刺史百司震
肅饗餐風靡惡直醜正恭事法官帝念其勤屢被榮
命漁陽太守還遷度遼將軍協德魏降和戎綏邊徵
河南尹毋憂乞行服闋奔命孝和皇帝時機密久缺
百僚僉允詔拜尚書歷僕射令納言危行不絀以公
事去民神憤怒群公薦之帝曰俞哉徵拜將作大匠
大司農大鴻臚大僕射公所蒞任憲天心以教育激
垢濁以揚清懿鑠之美昭登于上不顯之化宣聞于

下及遷台司位太尉補袞闕叙藝倫天人交格終始
無疵雖元凱翼虞周召輔姬未之或踰功遂身退以
疾自遜求歸田里告老致仕七十有六嘉平四年薨
海內咨嗟莫不惻焉故吏潁川太守張溫等相與嘆
曰名莫隆於不朽德莫盛於萬世銘勒顯于鍾鼎清
烈光于來裔刊石立碑德載不泯詞曰天垂三台地
建五岳降生我哲應鼎之足奕世載德名昭圖錄旣
文且武桓桓紹續外則折衝內則大麓惟清惟敏品
物以熙告老懸車天人靡欺曾不百齡圮我國基入

之云亡八極悼思申德作頌光寵宣流鐫紀斯石鴻烈顯休

陳留索昏庫上里社銘

曰社祀之建尚矣昔在聖帝有五行之官而共工子
勾龍為后土及其沒也遂為社祀故曰社者土地之
主也周禮建為社位左宗廟右社稷戎醜攸行於是
受脤音任女胎也土膏恒動於是祈農又頒之于兆民春
秋之中命之供祠故自有國至于黎庶莫不祀焉惟
斯庫里古陽武之戶牖鄉邦秋時有子華為秦相漢
興陳平由此社宰遂佐高帝克定天下為右丞相封
曲逆侯永平之世虞延為太尉司空封公至嘉平延
弟曾孫放字子卿為尚書外戚梁冀乘寵作亂首策

誅之王室以績封召都亭侯太僕太常司空毗天子
而維四方克措其功往烈有常於是司監爰暨邦人
僉以爲宰相繼踵咸出斯里秦一漢三而虞氏世焉
雖有積善餘慶修身之致亦斯社之所相也乃與樹
碑作頌以示後昆唯王建祀明事百神乃顧斯社于
我兆民明德惟馨其慶筆彰自羸及漢四輔代昌爰
我虞宗乃世重光元勳旣立錫茲土疆乃公乃侯帝
載用康神人協祚且巨且長凡我里人盡受嘉祥刊
銘金石永世不忘

陳留太守胡公碑

君諱碩字季獻交趾都尉之孫太傅安鄉侯少子也
其先與楚同姓別封于胡以國爲氏臻乎漢奕世載
德不替舊勲君幼有嘉表克岐克嶷不見異物習與
性成孝于二親養色寧意蒸蒸雍雍雖曾閔顏萊無
以尚也總角入學治孟氏易歐陽尚書韓氏詩博綜
古文周覽篇籍言語造次必以經綸加之行已忠儉

事施順恕公體所安與衆共之驕吝不萌於內喜愠不形於外可謂無競伊人溫恭淑慎者也初以公在司徒除郎中宿衛十年遭叔父憂以疾自免州郡交辟皆不就後以大將軍高第拜侍御史遷諫議大夫以將軍事免官舉賢良方正不詣公車建寧元年召拜議郎納忠盡規匪懈于位遷侍中虎賁中郎將是年遭疾屢上印綬詔書聽許以侍中養疾其年七月被尚書召不任應命詔使謁者劉惺齎印綬卽拜陳留太守君聞使者至加朝服拖紳使者致詔君以手

自繫陳辭謝恩其明二十一日遣吏奉章報謝意氣精朗是日疾大漸刻漏未分奄忽而卒時年四十一天子憫悼詔使者王謙送葬以中牢具祠賜錢五萬布百疋贈穀三千斛同位畢至赴弔雲集生榮未艾沒有餘哀於是遐邇搢紳爰暨門人相與嘆述君德追痛不寘恒切情僚無不求懷行由已作名自人成先民旣邁賴茲頌聲嗟我明哲如何勿銘乃作辭曰猗歟懿德令聞有彰祗服其訓克構克堂孝思唯則文藝不光敦厚忠恕衆悅其良綏弱以仁不云我強

爰自登朝進退以方見幾而作如鴻之翔乃位常伯
恪處左右兼掌虎賁禁戎允理邁茲虐痾帝用悼止
俾守陳留庶篤其祉王人既詔景命不俟嗚呼昊天
殲我英士如何贖也命不自己哀哉永傷萬年是紀

太守胡公碑銘

君諱碩字季獻交趾都尉之孫太傅安樂侯之子也
順帝時爲郎中桓帝時遭叔父憂以疾自免荊州將
軍每辟輒辭疾後以高等拜侍御史遷諫議大夫舉
賢良方正病不詣公車建寧元年七月拜陳留太守

病加不任應召詔使謁者劉惔卽授印綬二十一日
卒詔遣使者王謙以中牢具祠特賜錢五萬布一百
疋贈穀三千斛儔類赴送遠近鱗集於時陳留主簿

高吉蔡軫

音枕車後橫木也

等咸以郡選克備官屬來迎者

三十四人奔驚跋涉願承清化逢天之戚不獲延祚
痛心絕望切怛永慕乃相與衰經庭位號眺靈柩將
窆

音便下

棺也

申敕修儀疚在輿服寮御部引各執其職

路人感愴觀者嘆息遂樹碑作銘以表令德於藐下
國瞻仰俊乂欽見我君爰綏我惠式昭績恩有勞其

粹昊天不弔景命顛墜悠悠蒸黎惆悵喪氣政雖未
宣古之遺愛祁祁我君習習冠蓋修誠以迓曾不更
邁靈魂徘徊靡所瞻逮惟其傷矣胸肝摧碎勒銘告
哀傳千萬代

蔡中郎文集卷第五

國家圖書館, NATIONAL CENTRAL LIBRARY, TAIWAN, R.O.C.

蔡中郎文集卷第六

國家圖書館, NATIONAL CENTRAL LIBRARY, TAIWAN, R.O.C.



荅齋議

日月詔召尚書問立春當齋迎氣東郊尚書左丞馮方毆殺指揮使於尚書西祠可齋否得無不宜具對議郎臣蔡邕博士任敏死罪對按禮上帝之祠無所爲廢齋者所以致齊不敢渙散其意官室至大指使至微不在齋潔之處元和詔禮無免齋宜以自潔靜交神明本無嫌間祠室又寬可齋無疑詩云唯此文王小心翼翼昭事上帝聿懷多福夫齊以恭奉明祀文王所以懷福無有不宜臣邕敏愚戇死罪

幽冀刺史久闕疏

臣聞國家置官以職建名臣愚淺小才竊假階級官以議爲名職以郎爲貴智淺謀漏無所獻替夙夜寤嘆憂悸怛惕臣邕頓首死罪伏見幽州奕騎冀州強弩爲天下精兵國家瞻仗四方有事軍師奮攻未嘗不辦於二州也頃者以來連年饑荒穀價一斛至六七百錢故護烏桓校尉夏育出征鮮卑無功而還士馬死傷者萬數弓兵散亡幾盡生民之本守禦之備

無一可恃百姓元元流離溝壑寇賊輩起莫能禁討
長吏寒心朝不守夕卒有他方之急則役之不可驅
使自爲寇虜則誅之不可擒制豈非可憂之難三府
選幽冀二州刺史踰月不定臣恠問其故云避三五
十一州有禁當取二州而已二州之中少素有威名
之士或拘限歲年不應選用狐疑遲淹兩州空懸萬
里蕭條無所管繫每冀州長吏初除詔書治嚴不過
五日今者刺史數旬不選誠非其理愚以爲三五之
禁禁之薄者以陛下威靈申明禁令在任之人豈不

戒懼而當坐設三五自生留闕音愛邪昔孝景時梁
人韓安國坐事被刑起徒中爲內史武帝患東越數
反拜故待詔會稽朱買臣宣帝時患冀州有盜賊故
京兆尹張敞有罪逃命上使使就家召爲冀州刺史
安國徒隸買臣郡民皆還治其國張敞亡命擢授劇
州豈顧三五拘官簿得救時之便也卒獲其用遺芳
不滅此先帝不誤已然之事三公明知二州之要尤
宜揀選當越禁取能以救時弊而不顧爭臣之義苟
避輕微之科竊見日月拘忌選既稽滯又未必審得

其人則二部蠢蠢將爲憂念願陛下上則先帝用三
臣之法蠲除近禁其諸州刺史器用可換者無拘日
月三五以差厥中臣悽悽瞽言惟陛下留神再省三
省

蔡中郎集卷第三

漢 陳留蔡邕著

明新安汪士賢校

難夏育上言鮮卑仍犯諸郡

嘉平六年夏護烏桓校尉育上言鮮卑仍犯諸郡自
春以來三十餘發請徵幽州諸郡兵出塞擊之一冬
春足以掃滅時故護羗校尉田晏以他論刑被原私
留京師用尚書行賄通謀中常侍王甫求爲將甫建
議當出師與育并力詔書遂用爲破鮮卑中郎將使

匈奴中郎將南單于以下與育晏三道並出時朝廷大臣多以爲不便召公卿百官會議中郎蔡邕以爲書戒猾夏易伐鬼方周宣王命南仲吉甫攘獫狁威蠻荆漢有衛霍闡顏瀚海竇憲燕然之事征討之作所由尚矣然而時有同異勢有可否故謀有得失事有成敗不可齊也自漢興以來匈奴常爲邊害而未聞鮮卑之事昔謀臣竭精武夫戮力而所見常異其設不戰之計守禦之因者皆社稷之臣永久之策也孝武皇帝因文景之畜用度饒衍南伐越北伐胡西

征大宛東并朝鮮兵出數十年帑藏空竭官民俱匱乃興鹽鐵酤權之利設告緡重稅之令民不堪命及盜賊羣起關東紛然道路不通繡衣直指之使奮鉞鉞而並出然後僅得寧息既而覺悟乃封丞相爲富民侯故上又假曰夫務戰勝窮武事未有不悔者也夫世宗神武將卒良猛財賦充實所拓廣遠而猶有悔况無彼時地利人財之備而欲輕動此其不可一也鮮卑種衆新盛自匈奴北遁以來據其故地稱兵十萬彌地千里意智益生才力勁健加以禁網漏洩

善金良鐵出者莫察漢人逋逃爲其謀主兵利馬疾過於匈奴昔段穎良將習兵善戰經營西羌猶十餘年今育晏欲以三年之期專勝必克育晏策慮未能過穎鮮卑種衆又不弱於西羌也乃欲張設近期誘戲朝廷三年不成必迫於害禍結兵連不得中休轉運糧饟不可勝給天無豐歲官見殫財民人流移於四方不能還其骸骨以此時興議橫發一發不已必至再三諸夏之內弱者伏尸強者作寇邊郵之患手足之疥癢也中國之困曾昔之癩疽也其不可二也

育云自秦以來三十餘發方今郡縣盜賊劫擄人財攻犯官民日月有之冠帶之圻吏調政密猶不能絕况此醜虜羣類抵冒心不受仁膽不畏威而可使斷無盜竊昔者高祖乃忍平城之耻吕后甘棄媼書之詬於是何者爲甚是其不可三也天設山河秦築長城漢起塞垣所以別內外異殊俗也其外則介之夷狄其內則任之良吏後嗣遵業慎奉所遺苟無蹙國內侮之患豈與虫蠶之虜校往來之數哉乃欲越幕踰城度塞出攻得地不可耕農得民不可冠帶破之

不可殄盡而本朝必爲之旰食四海必爲之焦枯其不可四也夫煎盡府帑之蓄以恣輕事之人專勝者必未克挾疑者必未敗衆所謂危聖人不任朝議有嫌明主不行是其不可五也按育一戰所獲不如所失昔淮南王安諫伐越曰天子之兵有征無戰言其莫敢校也使越人蒙死徼幸以逆執事廝輿之卒有一不備而歸者雖得越王之首猶爲大漢之羞威化不行則欲伐之狐疑避難則守爲長宜通乎時變且憂萬人饑餓與蠻夷之不討何者爲大宗廟之祭凶

年不備况避不遜之辱哉今關東大困無以相贍又議動兵非但勞人凶年隨之其罷救有不可勝言者此先帝所以發德音也夫卹民救患雖成郡列縣尚猶棄之况以彰塞之外未嘗爲人居者乎臣愚以爲宜止征伐之計令諸營甲士循行塞垣屯守衝要以堅牢不動爲務若乃守邊之術李牧開其原嚴尤申其要遺業猶在文章具存循二子之策守先帝之規臣曰可矣臣邕愚戆議不足采臣邕頓首頓首

荅詔問災異八事

光和元年七月十日詔書尺一召光祿大夫楊賜諫議大夫馬日磾議郎張華蔡邕太史令單飈詣金商門引入崇德殿署門內南辟帷中爲都座漏未盡三刻中常侍育陽侯曹節冠軍侯王甫從東省出就都

座東面十門劉寵龐訓北面賜南面日磾華邕颺西面受詔書各一通尺一木板草書兩常侍又諭旨朝廷以災異憂懼特旨密問政事所變改施行務令分明賜等稱臣再拜受詔書起就坐五人各一處給財用筆硯爲對臣學識淺薄心慮愚暗不足以荅聖問情衷變易怔營怖悻謹列狀上臣邕頓首頓首

詔問曰去月二十九日有黑氣墮溫德殿東庭中黑如車蓋降氣奮勢五色有體長十餘丈形狀似龍似虹蜺對虹著於天而降施於庭以臣所聞則所謂天

投虹者也不見尾足者不得勝龍易曰蜺之比無德以色親也潛潭巴曰虹出后妃陰脅主又曰五色蜺出至昭于宮殿有兵革之事演孔圖曰蜺者斗之精氣也天度投蜺見主惑於毀譽合讖圖曰天子外苦兵威內奮臣無忠政變不虛生古不虛言意者陛下關機之內衽席之上獨有以色見進陵尊踰制以招衆變若羣臣有所毀譽聖意低回未知誰是兵戎不心威權浸移忠言不聞則虹蜺所生也抑內寵任忠賢決毀譽使貞雅各得其所嚴守衛整威權機不假

人則其所救也易傳曰陽感天不旋國書曰惟辟作威惟辟作福臣或爲之謂之凶害是以明主尤務焉諺問曰正月三日有白衣入德陽殿門辭稱伯夏教我上殿與中黃門桓賢晤言相往來不得入遂亡去不知姓名臣聞凡人爲恠皆皇極道失下或謀上故其傳曰皇之不極是謂不建則有下謀上之病孝成綏和二年八月男子王褒衣小冠帶劍入北司馬殿東門上殿入室解帷組佩之招前殿署王業等曰天帝命我居此業收縛考問褒故公車卒病狂不自知

入宮乃下獄死是時王莽爲司馬遂爲篡亂亦卒誅
臣竊思之與綏和時相似而有異被服旣不同來入
雲龍門而稱伯夏教入殿裏與桓賢言伯夏卽故大
將軍梁商商子冀冀子不疑等皆以罪受戮殘餘非
天所祐以往況今將狂狡之人爲王氏之禍未至殿
省而覺亡不久伏誅夫誠仰見上帝之厚德也潛潭
巴曰有人走入宮不知其名大水爲戒天子驚群陰
太隆群下並湊強盛也建大中之道舉賢良而寵祿
之則其救也經曰皇建其有極歛時五福用敷錫厥

庶民惟時厥庶民于汝極錫汝保極

詔問曰南宮侍中等聞雌雞欲化爲雄尾身毛已似
雄頭尚未變臣聞凡雞爲恠皆貌之失也傳曰貌之
不恭是謂不肅時卽有雞禍孝宣黃龍元年未央宮
輅軫中雌雞化爲雄不鳴無距是時元帝初卽位將
立妃王氏爲后至初元元年丞相史家雌雞化爲雄
距而鳴是歲封后父禁爲平陽侯而后正位王氏之
寵始盛哀帝晏駕后攝政王莽以后兄子爲大司馬
由是爲亂昔武王伐紂曰牝雞之晨惟家之索易傳

曰婦人專政國不靜牝雞雄鳴主不榮夫牝雞但雄
鳴尚有索家不榮之名况乃陰陽易體名實變改此
誠大異臣竊以意推之頭爲元首人君之象今雞身
已變未至於頭而聖主知之訪問其故是將有其事
而不遂成之象也若應之不精誠無所及頭冠或成
卽爲患災敬慎威儀動作之容斷娶御改興政之原
則其救也夫以匹夫顏氏之子有過未嘗不知知之
未嘗復行易曰不遠復無祇悔元吉

詔問曰卽祚以來災眚屢見頻歲月蝕地動風水不
時疾癘流行迅風折樹河洛盛溢臣聞陽勝則震陰
勝則食思亂則風貌失則雨視闇則疾癘流行水不
潤下則河流滿溢明君正上下抑陰尊陽修五事於
聖躬致畿甸於供御則其救也

詔問星辰錯謬臣竊見熒惑變色入太微西門太白
正晝而見臣聞熒惑示變主當精明其德而有休慶
之色太白當晝而見是陰陽爭明強國弱國強皆
有失政又失道而見是爲羸長侯王不榮熒惑主禮
太白血主兵謹禮事治兵政審察中外之言申明守禦

之令以杜漸防萌則其救也昔宋景公小國諸侯三有德言而熒惑爲之退舍

詔問蝗虫冬出臣聞易傳曰大作不時天降災厥咎蝗虫來河圖秘徵篇曰帝貪則政暴吏酷則誅深而蝗虫出息不急之作省役賦之費進清仁黜貪虐介損求安屈省別

家之有

家言有天下者

所從出門之正者也武庫禁兵所

藏國家之本兵也變此二處異於凡屋易傳曰小人在位上下咸悖其妖城門內崩潛潭巴日出宮瓦自墮諸侯強凌主易傳曰一柱泥故法棄其咎宮室傾圮小人在顯位者黜之以尊上整下去暴悖之愆抑諸侯強凌主之漸率由舊章以變杜泥棄法之咎則其救也洪範傳曰六沴作見若時共禦帝用不差神則不怒五福乃降用彰於下

詔問曰朝廷焦心聞災恐懼每訪羣公卿士皆各括囊迷國莫肯建忠規闕以邕博學深奧退食在公故

特密問宜披演所懷指陳政要所先後勿有依違顧
忌以經術分別皂囊封上勿漏所聞臣邕伏惟陛下
聖德允明深悼變異德音懇誠褒臣博學深奧退食
在公非臣螻蟻愚怯所能堪副亦臣輸寫肝膽出命
之秋豈可顧患避害復使陛下不聞至戒哉臣邕頓
首死罪伏思諸異各應皆亡國之恠也天於大漢殷
勤不已赤帝之精輔或未衰故屢出妖變以當責讓
因以感覺則危可爲安凶可作吉假使大運已移豈
有譴告哉春秋魯定哀公之時周德已絕故數十年

無有日蝕此人爲天所棄故也至於今者災眚之發
不於他所遠則門垣近在署寺紛降目前欲使陛下
豁然大悟可謂至切矣幸陛下深問臣敢不盡情以
對蜺墮雞化皆婦人干政之所致也卽祚以來宮中
無地逸竄而乳母趙婕貴重赫赫生則貲富侔於帑
藏死則丘墓踰越園陵兩子受封兄弟典郡續以承
樂門史霍王依阻城社大爲奸禍盜寵竊權藏晦惑
之罪事必積浸然後成形虹蜺集庭雌雞變化豈不
謂是今者道路紛紛復云有程大人者察其風聲將

為國患宜高其隄防明其禁限深惟趙霍以為至戒
論者疑太尉張顥為王所進暗昧已成非外臣所能
審處如誠有之近者不治無以正遠傾邪在官當有
所懲光祿勳偉璋所在充貪濁九列之中豈宜有此
牧守數十選代既不盡由本朝反有異輩無以示四
方聖意勤勤欲清流蕩濁扶正黜邪不得但以州郡
無課而已長水校尉趙玼屯騎校尉蓋升其貴已足
其富已優當以見災之故為陛下先群臣引退以解
易傳所載小人在位之咎伏見廷尉郭禧敦重純厚

之老成光祿大夫橋玄聰達方直有山甫之姿故

太尉劉寵忠實守固

音綱志純一也

幅音勞至剛正並宜

為謀主數見訪問夫宰相大臣君之四體委任責成
優劣已分春秋之義以貴治賤遠間親小加大引在
六道陸階增則堂高輔位重則上尊不宜聽納小吏
雕琢大臣也又尚方工技之作洪都篇賦之文宜且
消息以示憂懼詩云畏天之怒不敢戲豫天戒誠不
可戲也宰府孝廉士之高選但當察其真偽以加黜
陟近者每以辟召不慎切責三公乃並以書疏小文

一介之技超取選舉開請託之門違明王之典衆心
不厭莫之敢言臣願陛下聽納忠言忍而絕之側身
踴躍思惟萬幾以荅天望以導嘉應聖朝旣自約厲
以身率人左右近臣亦宜戮力從化人自抑損天道
虧滿鬼神福謙久高不危常滿不溢羣公之福諸侯
凌主之戒不可不察也臣邕愚戆感激忘身敢觸忌
諱手書具對夫君臣不密上有漏言之戒下有失身
之禍臣安敢漏所問願寢臣表無使盡忠之吏受怨
姦仇



被收時表

議郎龔上臣鬻頓首再拜上書皇帝陛下今月十三日臣被尚書召問臣以大鴻臚劉邵前為濟陰太守臣屬吏張宛長休百日邵為司隸又託河內郡吏李奇為州書佐及營護故河南尹羊陟侍御史胡母班邵不為屬致怨之狀臣懼營怖悸肝膽塗地不知死命所在竊自尋按實屬宛奇不及陟班凡休假小吏


皆非結恨之本與陟姻家豈敢申助私黨如臣父子欲相傷陷當明言臺閣具陳恨狀所緣內無寸事而謗書外發宜以臣對與邵參驗臣得以學問特蒙褒異執事秘館操管御前姓名貌狀微簡聖心今年七月召詣金商門問以變異齋詔申旨誘臣使言臣實愚戇出命忘軀不顧後患譏切公卿內及寵近區區欲荅上問救恠異為陛下圖康寧之計而巳預知所言者當必然怨臣陛下不念忠臣直言宜加掩蔽誹謗卒至便用疑恠豈不負盡忠之吏哉每有災異輒令

百官各上封事欲以改政息譴除凶致吉而言者不
蒙延納之福旋被陷破之禍群臣杜口以臣爲戒誰
敢復爲陛下盡忠者乎臣季父質連見拔擢位在上
列臣被蒙恩渥數見訪問言事者因此欲陷臣父子
破臣門戶非復發糾姦伏補益國家者也臣年四十
有六孤特一身前無立男得盡節王室託名忠臣死
有餘榮然恐陛下不復聞至言矣臣愚以凡冗招致
禍患自臣職耳臣對問時質爲下邳相不聞臣謀今
日橫見逮及使質恨以衰老白首隨臣摧沒并內坑
陷以快言事厭副其心誠寃誠痛陛下仁篤之心必
不忍此思之未至耳臣一入牢檻當爲筆楚所迫趣
斂章辭情何緣復達臣死期垂至冒昧自陳乞身當
辜戮免質并坐臣死之日則生之年也唯陛下加矜
爲百姓自愛臣邕死罪

蔡中郎集卷二

二

蔡中郎集卷第二終



國家圖書館, NATIONAL CENTRAL LIBRARY, TAIWAN, R.O.C.

蔡中郎文集卷第七

和熹鄧后謚議

孝和鄧皇后崩群臣謀謚於是尚書陳忠上言以爲鄉黨叙孔子威儀俯仰無所遺彤管記君王纖微大小無不舉是以德著圖籍名垂於後伏唯大行皇后規乾則坤兼包日月厥初作合允有休烈貫魚之次加於小媵中饋之叙昭於帷幄遭家不造三元之厄孝殤幼冲國祚中絕海內紛然羣臣累息加以洪流爲災扎荒爲害西戎蠢動武威侵侮并涼猾夏寇

振驚渤碣家有採薇之思人懷殿音之聲皇太后
 參圖考表求人之瘼度越平原建立聖主垂疇咨之
 問遵六事之求勞謙克躬菲薄為務是以尚官損服
 衣不粲英饗人徹羞膳不過擇黃門闕樂魚龍不作
 織室絕伎纂組不經尚方抑巧雕鏤不為離宮罕幸
 儲峙不施遐方斷篚侏離不貢罷出宮妾免遣宗室
 没入者六百餘人以紓鬱滯奉率舊禮交饗祖廟以
 展孝子承歡之敬蠲正憲法六千餘事以順漢氏三
 百之期經藝乖舛恐史闕文命衆儒考校東觀閣學

博上一缺廣選十人何有伐檀茅茹不拔屢舉方古
 顯擢孝子遵忠孝之紀啓大臣喪親之哀疾貧吏受
 取為姦糾增舊科之罰惡長吏虛偽錮之十年進崇
 世祖功臣國土或有斷絕封植遺苗以奉其祀對高
 蘭諸國胤子以紹三王之後事不稽古不以為政政
 不惠和不圖於策猶不自專傳謀遠暨乞求殿中刑
 之所加不阿近戚賞之所及不遺側陋終朝反側明
 發不寢徒以百姓為憂不以天下為樂聖誠著於禁
 闈而德教被於萬國故自昏墊迄于康乂叛虜蜂集

賊害邊陲永元之世以爲遺誅今畏服威靈稽顙卽
斃徼外絕國慕義重譯來獻其琛史官咸賀請作王
頌却而不聽郡國咸上瑞應寢而不宣允恭抑損密
勿在勤遭疾不豫垂念臣子御輦在殿顧命群司流
恩布澤大赦天下有始有卒同符先聖昔書契所載
虞帝二妃夏后塗山高陽有辛姬氏任母徒以正身
率內思媚周京爲高未有如大行皇后勤精勞思篤
繼國之祚正三元之衡康百六之會消無妄之運者
也功德巍巍誠不可及漢世后氏無謚至於明帝始

建光烈之稱是後轉因帝號加之以謚高下優劣混
而爲一違禮大行受大名小行受小名之制謚法有
功安居曰熹帝后謚禮亦宜同大行皇太后宜謚爲
和熹皇后上稽典訓之正下協先帝之稱

爲陳留太守上孝子

臣前到官博問掾史孝行卓異者臣門下掾申屠燮稱孝子平丘程未年十四歲時祖父叔病歿未抱伏叔尸號泣悲哀口乾氣少喘息纒屬舅偃哀其羸劣嚼棗肉以哺之未見食噓唏不能吞咽麥飯寒水間用之舅偃誘勸哽咽益甚是後精美異味遂不過口常在樞旁耳聞叔名目應以淚前太守文穆召署孝義童云以叔未葬不能至府舍臣輒核問掾史邑子殷盛宿彥等辭驗皆合臣卽召來見未年十四歲顏色瘦小應對甚詳臣問樂爲吏否垂泣求去白歸

所臣爲設食但用麥飯寒水不食肥膩舅本以田作爲事家無典學者其至行發於自然非耳目聞見所倣效也雖成人之年知禮識義之士恐不能及伏唯陛下體因心之德當中興之運躬兼萬幾建用皇極神紀騁於無方淑暢洽於羣生故醇行感時而生美義因政以出清風奮揚休徵誕漫太平之萌昭驗已著臣誠伏見幸甚臣聞魯侯能孝命於夷官張仲孝友侯在左右周宣之興實始于此且烏以反哺託體太陽羔以跪乳爲贄國卿禽鳥之微猶以孝寵况未

稟純粹之精爽立百行之根源其人隱瘁而德曜彌
光其族益章臣不勝願會使未美昭顯本朝謹陳狀
臣邕頓首

薦邊文禮

明將軍以申甫之德當中興之隆建上將之任膺秉
國之權妖寇作孽震驚京師運籌帷幄定策屆勝先
擒馬元歸近之變天兵致誅兗豫以清冀荆用次雲
消席卷克厭衆心王室以寧萬國兆民莫不賴祉伏



惟幕府初開博選清英華髮舊德並爲元龜成功立
事莫不畢舉雖振鷺之集西廡濟濟之在周庭無以
或加伏見陳留邊讓字文禮天授逸才聰明賢知纂
成伐柯不遠之則韶音迢齒音觀俱夙孤不隊家訓始
任學問便就大業閒不遊戲初覽諸經見本知義尋
端極緒受者不能答其問章句不能遂其意詩書易
禮先通大義業以次舉衆傳篇章無術不綜心通性
達剖織入冥口辯辭長而節之以禮度安詳守固守
持內定非禮勿動非法不言據狐疑之論定嫌密之

分經典交至檢括並合衆夫嘉焉莫之能奪使讓生
於先代在唐虞則元凱之比當仲尼則顏冉之亞豈
徒世俗之凡偶兼混是非講論而已哉才藝言行卓
逸不羣階級名位亦宜超然不以常制爲限長幼爲
拘若復輩從此郡選舉非所以彰瓌瑋之高價昭大
知之絕明也傳曰函音咸咸牛之鼎一日立之以烹
雞多汁則淡而不可食少汁則焦而不可熟大器之
於小用固有所不宜也邕誠竊悵悒悒在此寶鼎未受
犧牛大羨之和久佐煎熬音銜馘音恣之間願明

將軍回謀守慮思垂采納就讓疾病所親察之更以
屬缺招延表貢行狀列于王府躋之宗伯納之機密
展其力用副其器量夫若以年齒爲嫌則顏淵不得
冠德行之首子竒不得紀治阿之功苟能其事古今
一也密疏特表及期而行邦國其昌邕寢羸匍匐拜
寄不敢須通



薦皇甫規

臣聞唐虞以師師成熙周文以濟濟爲寧區區之楚猶用賢臣爲寶衛多君子季札知其不危由此言之忠臣賢士國家之元龜社稷之楨固也昔孝文愠匈奴之生事思李牧於前代孝宣忿奸邪之不散舉張敞於亡命况在於當時謙虛爲罪而可遺棄臣伏見

護羌校尉皇甫規少明經術道爲儒宗修身力行忠亮闡著出處抱義皦然不污藏器林藪之中以儼徵召之寵先帝嘉之群公歸德盜發東岳莫能櫻討即起家拜爲太山太守屠斬桀黠綏撫犷弱青兗之郊迄用康乂自是以來方外有事戎狄猾華進簡前勳連見委任伏節舉麾威靈盛行實化凶悍使爲慙愿愛財省穡每有餘資養士御衆悅以亡死論其武勞則漢室之干城謀其文德則皇家之腹心誠宜試用以廣振鷺西離之美臣以頑愚忝污顯列輒流汗墨

卷之二
不堪之責不勝區區執心所見越職瞽言罪當死唯
陛下留神省察臣邕頓首頓首

蔡中郎文集卷第七

國家圖書館, NATIONAL CENTRAL LIBRARY, TAIWAN, R.O.C.



蔡中郎文集卷第八

國家圖書館, NATIONAL CENTRAL LIBRARY, TAIWAN, R.O.C.



薦太尉董卓可相國

臣某等聞周有流彘之亂而宣王以興漢有昌邑之難而中宗以昭由此觀之天生神聖特以靖亂整殘丕誕洪業輔佐重臣國之楹棟生應期運稟氣山岳是故申伯山甫列于大雅蕭曹丙魏載于史籍國遭奸臣孽妾制弄主權累葉相繼六十餘載火熾流沸浸以不振威移羣下福在弄臣海內嗷嗷被其傷毒

故大將軍慎侯可進盡忠出身圖議溢滌以清季朝羣凶遘難兵起亂作元舅上卿先寇受害禍至執辱社稷傾危太尉郡侯卓起自東土封畿之外義勇憤發旋赴京師先陳便宜列表奸猾羣慝情狀辭意激切感物悟靈精兵虎臣承持卓勢奪擊醜類漏刻之間靡有孑遺卓聞乘輿已趨河津身率輕騎長驅印阜上解國家播越之危下救兆民塗炭之禍然後黜廢頑凶爰立聖哲天心聿得萬國賴祉及至差功行賞辭多受少近臣幸臣一人之封戶至萬數今者受

爵十有一人總合戶數千不當一封今月七日卓又
上書辭疾讓位乞就國土上違聖主嘉寵之至下乖
群生瞻仰之望非所以褒功賞勲也惟陛下益隆委
任數加訪問厚其爵賞責以相業之成臣等不勝大
願謹陳狀臣邕等頓首頓首死罪死罪

讓尚書乞在閒冗

臣謹按漢書高祖受命流離藏竄十有二年陛下應
期中興龍飛踐祚奸臣嬖孽一時殄盡憎疾臣者隨
流埋沒太尉郡侯卓收拾洗濯上臣高第補侍御史

轉治書御史陛下天地之大德聽納大臣扶節文舉
遂用臣邕充備機密三月之中充歷三臺光榮顯著
非臣愚蔽不才所當盜竊非臣碎首糜軀所能補報
臣邕頓首頓首死罪死罪臣聞世宗之時田千秋有
神明感動一言以悟聖聽昭發上心故有一日九遷
臣邕草萊小臣思謀愚淺生非千秋職不狎練加以
新來入朝不更郎署攝省文書其猶面牆陛下統繼
大業委政冢宰大傅隗以舊典入錄機密事尚書今
日禪先輩舊齒德更上公僕射允故司隸校尉河南

尹尚書張熹已歷九列魯旭侍中牧守宣藩剖符數
郡唯臣官位微賤特單輕匹此六臣臣當自知况於
論者將謂臣何是以夙夜寤歎寐息屏營無顏以居
無心以寧明時階級人所勸慕乞在他署抱關執籥
以守漏刻則臣之心厭飫足矣降榮於悴退顯於進
臣不勝區區疑戒不敢肅飾

巴郡太守謝版

臣尚書邕免冠頓首死罪臣猥以頑闇連值盛時超
自羣吏入登機密未及輸力盡心日下五府舉臣任



巴郡太守陛下不復參論府舉入奏驚惶失守非臣
敢安怔營累息不知所措臣邕頓首死罪知納言任
重非臣所得久忝今月丁丑一章自聞乞在閒冗抱
關執籥不意錄符銀青授任千里求退得進後上先
遷爲衆所恠不合事宜願乞還詔命盡力他役死而
後已臣猥以愚闇盜竊明時周旋三臺充列機衡出
入省闈登踏丹墀承隨同位與在行列以受酒禮嘉
幣之賜詔書前後賜石鏡奩禮經素字尚書章句白
虎議奏合成二百一十二卷及唾壺彈棋石枰蓮香

瓠子黎錫汁器圍盧誠物誠念及下錫惠周至每敕
勿謝前後重疊雖父母之於子孫無以加此未得因
緣有事荅稱萬一不意卒遷荷受非任臨時自陳未
蒙省許慘結屏營踧躅受拜命服銀青光寵休顯上
耀祖先下榮昆裔誠非所望且巴士長遠江山修隔
頃來未悉輯睦劉焉撫寧有方柔遠功著臣以頑蒙
不閑職政宣暢聖化道遵和風非臣才力所能供給
必以忝辱煩污聖朝幸循舊職當竭肝膽從事助絕
骨破以命繼之臣邕頓首死罪

宗廟祝嘏辭

嗣曾孫皇帝其敢昭告于皇祖高皇帝各以后配昔受命京師都于長安享國十有一世歷年二百一十載遭王莽之亂宗廟隳壞世祖復帝祚遷都洛陽以服土中享國一十一世歷年一百六十五載予末小子遭家不造早統洪業奉嗣無疆關東吏民敢行稱亂總連州縣擁兵聚衆以圖叛逆震驚王師命將征

服股肱大臣推皇天之命以已行之事遷都舊京昔周德缺而斯干作應運變通自古有之於是乃以三月丁亥來自雒越三月丁巳至于長安飭躬不慎寢疾旬日賴祖宗之靈以獲有瘳吉日齊宿敢用潔牲一元大武柔毛剛鬣尚祭明視鄉音齊合嘉蔬香其醜音齎音豐本明粢醴酒用告遷來尚饗

九祝辭

高皇帝使工祝承致多福無疆于爾嗣曾孫皇帝使爾受祿于天宜此舊都萬國和同兆民康乂眉壽萬

年子子孫孫永守民庶勿替引之

宗廟迭毀議

左中郎將臣邕議以爲漢承亡秦滅學之後宗廟之制不用周禮每帝卽位輒立一廟不止於七不列昭穆不定迭毀孝元皇帝皆以功德茂盛尊崇廟稱孝文曰太宗孝武曰世宗孝宣曰中宗時忠正大臣夏侯勝猶執議欲出世宗至孝成帝議猶不定太僕王舜中壘校尉劉歆據經傳義謂不可毀上從其議古

人考據慎重不敢私其君父若此其至也後遭王莽之亂光武皇帝受命中興廟稱世祖孝明皇帝聖德聰明政參文宣廟稱顯宗孝章皇帝至孝丞丞仁恩溥大海內賴祉廟稱肅宗北方前事得禮之宜自此以下政事多釁權移臣下嗣帝殷勤各欲褒崇至親而已臣下懦弱莫能執夏侯之直故遂衍溢無有方限今聖朝遵古復禮以求厥中誠合事宜禮傳封儀自依家法今不知國家舊有宗儀聖主賢臣所共創定欲就六廟黜損所宗違先帝舊章未可施行臣謹

按禮制七廟三昭三穆與太祖七孝元皇帝在世第八光武皇帝世在第九故以元帝爲考廟尊而奉之孝明遵制亦不敢毀元帝於今朝九世以七廟言之則非所宗八月報酬可出元帝王比惠景昭成哀平帝五年一致祭孝章皇帝孝桓皇帝親在三昭孝和皇帝孝順皇帝孝靈皇帝親在三穆廟親未盡四時常陳孝明以下穆宗敬宗恭宗之號皆宜省去以遵先典殊異祖宗不可參並之義今又總就一堂崇約尚省不復改作惟主及几筵應改而已正數世之所

闕爲無窮之常典稽禮制之舊則合神明之歡心臣
愚竊議不足採臣邕頓首頓首

始加元服與羣臣上壽

伏惟陛下應天淑靈丁期中興誕在幼齡聖姿碩義
威儀孔備俯仰龍光顏如日星言稽典謨動蹈規矩
緝熙光明思齊周成早智夙就叅美顯宗今月吉日
始加元服進御幘結以章天休臣妾萬國遐邇大小
同喜逸豫式歌且舞臣等不勝踴躍鳧藻謹奉生頭
酒九鐘稽首再拜上千萬壽陛下享茲吉福永守皇
極通遵大和靖綏六合宜民宜人受祿于天書曰一
人有慶兆民賴之其寧惟永詩曰顛顛昂昂如珪如

三才圖會卷一
璋令聞不忘萬壽無疆

蔡中郎集卷第一終



國家圖書館, NATIONAL CENTRAL LIBRARY, TAIWAN, R.O.C.

表賀錄換誤上章謝罪

今月十八日臣以相國兵討逆賊故河內太守王臣等屯陳破壞斬獲首級詣朝堂上賀臣邕奉賀錄故羽林郎將李叅遷城門校尉而署名羽林左監右衛尉社衍在朝堂而稱不在錄咎在臣不詳省按使叅以亡爲存衍以存爲亡錯奏謬錄不可行侍御史劾臣不敬當賜刑書懲戒不恪陛下天地之德不辱收戮丙辰詔書以一月俸贖罪臣邕怔營慙怖屏氣累息不知所自投處臣邕頓首死罪臣不惟石慶

怔營喜懼精魄播超恍惚如夢不敢自信臣伏惟
批小生學術虛淺少竊方正長麻宰府備數典城著作東觀無狀取罪捐棄朔野蒙恩徙還退伏吠畝復階朝謁進察憲臺遂充機密今守巴郡還備侍中車駕西還執鞭跨馬及看輪轂升輿下軫扶接聖躬既至舊京出備郎將中外所疑對越省闈羣臣之中特見褒異訖無雞犬鳴吠之用常以汗墨愧負恩寵誠不意悟猥與公卿以下錄功受賞命服金紫爵至通侯非臣草萊功勞微薄所當被蒙臣十四世祖肥如

侯佐命高祖以受爵賞統嗣曠絕除在匹庶臣子遺
苗裔復蒙顯封前功輕重不侔慙惶累息無心怡寧
唐虞之朝猶美三讓臣者何人受而不讓臣不勝戰
悼怵惕詣闕拜章上所假高陽侯印綬符策伏受罪
誅臣得微勞被受爵邑光寵榮華耀灼音祖禰非臣
小族陋宗器量褊狹所能堪勝非臣力用勤勞有所
當受誠無安寧甘悅之情國憲上行下不敢逆苟順
恩旨退省金龜紫紱之飾非臣容體所當服佩中讀
符策誥戒之詔非臣才量所能祇奉歷日彌久震懼
之誤簡忽校讎不謹之愆雖見原有仰愧先臣傷肌
入骨不勝忪蒙流汗臣邕頓首死罪

讓高陽侯印綬符策

詔制左中郎將蔡邕今封邕陳留雍丘高陽鄉侯下
印綬符策假限食五百戶歲五十萬穀臣稽首受詔

益甚臣聞高祖受命元功翊德者與共天下爵土故
曰使黃河若帶太山若礪國以求存爰及苗裔夫山
河至大猶謂之小重功輕賞如此其至也是以戰攻
之事大有陷堅破敵斬將搃旗之功小有音國獻截首日

音國獻截首級履傷涉血之難勤苦軍旅連年累歲首如

蓬葆體如漆幹勞瘁辛苦如此其重也以受爵土誰
曰不宜今者聖朝遷都應順天人奔走之役臣僕職
分宜然臣事輕葭草功薄蟬翼恐史官錄書臣等在
功臣之列陷恩澤之科垂名後葉作戒末嗣非本朝

之德政遇臣之長策臣是以宵寢晨興叩膺增歎心
煩慮亂喘呼息吸且鷦鷯巢林不過一枝鼯鼠飲河
不過滿腹小人之情求足而已臣不勝大願

再讓高陽侯印綬符策


臣忝自叅省資非哲人藩屏之用器非殿邦佐君之
才憂心灼煇音喧上聲耳目昏冒音中驚也蒙救罔累息屏
氣臣聞稷契之儔以德受命功德靡堪讓所不如昔
之范正不亡禮讓其下化之春秋采焉臣雖小醜不
足最勵以躡高蹤以詩人斯亡之戒觀見符策君

之誨兩印雙紱並在鞶帶至德元功器量弘大猶且
踧踖無心寧止况臣螻蟻無功德而散怠茸闕何以
居之且晏嬰辭邾殿之邑張良辭三萬之戶書籍紀
之以爲異美夫人君無弄戲之言憲法有誣罔之劾
臣不敢違矣飭虛以距上旨疑確音音之誠與神明通
謹奉章詣闕頓首敢固以請息伏惟留省

蔡中郎文集卷第八

京兆樊惠渠頌

洪範八政一曰食周禮九職一曰農有生之本於是乎出貨殖財用於是在九土上沃為大田多稔然而地有埆音堵埆音郎川有埶下溉灌之便行趨不至明哲君子創業農事因高卑之宜驅自行之勢以盡水利而富國饒人自古有焉若夫西門起鄴鄭國行秦李冰在蜀信臣治穰皆此道也陽陵縣東其地衍隩音與浦隩也水涯也土氣辛螫因食虫行毒也嘉穀不植草萊焦枯而涇水長流溉灌維首編戶齊氓庸力不供牧人



之吏謀不假給蓋常與役猶不克成光和五年京兆尹樊君諱陵字德雲勤恤人隱悉心政事苟有可以惠斯人者無聞而不行焉遂諮之郡吏申於政府僉以爲因其所利之事者不可已者也乃命方略大吏麴遂令伍瓊揣度計慮揆程經用以事上聞藥也付在三府司農遂取財於豪富借力於黎元樹柱累石委薪積土基跂工堅體勢強壯折湍流欵曠陂會之於新渠䟽水門通窬瀆灑之於畝畝清流浸潤泥潦浮游昔日鹵田化爲甘壤梗黍稼穡之所入不可

勝筭農民熙怡悅豫相與謳談疆畔斐然成章謂之樊惠渠云其歌曰我有長流莫或竭之我有溝澮莫或達之田疇斥鹵音骨莫修莫釐饑饉困悴莫恤莫思乃有樊君作人父母立我畝畝黃潦膏凝多稼茂止惠乃無疆如何勿喜我壤旣營我疆斯成泯泯我人旣富且盈爲酒爲釀蒸彼祖靈貽福惠君壽考且寧

乾

郡掾史張玄祠堂碑銘

掾諱玄字伯雅河南偃師人也其先張仲者實以孝
友爲名左右周室大漢初興張蒼爲丞相封北平侯
其後自河內遷于茲土世爲顯姓掾天姿恭恪宣慈
惠和允恭博敏惻隱仁恕正身履道以協閨庭損用
節財以贍䟽族動中規矩言合典式不知名彰不飾
行著可謂仁粹淑貞自然之素者已論者嘉之州郡
禮招署致掾史沉靜寡欲不求榮祿是以豐於天爵

薄於人位某月日遭疾而卒椽孫翻以貞固之質受
過庭之訓獲執戟出宰相邑遷太守得大夫之祿奉
烝嘗之祀尋原祚之所由而至於此先考積善之餘
慶陰德之陽報乃於是立祠堂假碑勒銘式明令德
以示乎後辭曰於惟我考允迪懿德治信斯順其儀
不忒仁惠周洽行惟模則篤垂餘慶貽此燕翼邈矣
遺孫用懷多福刊名金石流于罔極

袁滿來碑銘

茂德休行曰袁滿來太尉公之孫司徒公之子逸才

淑姿實天所授聰遠通敏越毘在闕明習易學從
如流百家衆氏遇目能識事不再舉問一及三具始
知終情性周備夙有首節孝智所生順而不驕篤友
兄弟和而無忿氣決泉達無所凝滯雖冠帶之中士
校材考行無以加焉允公族之殊異國家之輔佐衆
律其器士嘉其良雖則童稚今聞芬芳降生不永年
十有五四月壬寅遭疾而卒旣苗而不穗凋殞音允
華英嗚呼悲夫乃假碑旌于墓表嗟其傷矣惟以告
哀

章幼胡根碑銘

故陳留太守胡君子曰根字仲原生有家表幼而克
才角犀豐盈光潤玉顏聰明敏惠好問早識言語所
及智思所生雖成人之德無以加焉稟命不長夙罹
凶災年七歲建寧二年遭疾夭逝慈母悼痛昆弟孔
懷感襁褓之親愛憐國城之乖離乃權宜就封二祖
墓側親屬李陶等相與追慕先君悲悼遺嗣樹碑刊
辭以慰哀思辭曰於惟仲原應氣淑靈實有今儀而
氣如瑩明之之性與體俱生聞言斯識覩物知名

者太勤受誨則成柔順美與人靡爭忿不死對喜
不驕盈當受福永爲光爲榮如何昊天降此短齡惜
繁華之方擘兮望嚴霜而凋零嗟童孺之夭逝兮傷
慈母之肝清從皇祖乎靈兆兮庶神魄之斯寧哀慘
戚以流涕兮念污軫之不呈顧永懷於不朽兮乃託
辭於斯銘

司徒袁公夫人馬氏碑銘

維光和七年司徒袁公夫人馬氏薨其十一月葬哀子懿達仁達銜恤哀痛靡所寫懷乃撰錄母氏之德履示公之門人覩文感義采石于南山誌之群儒假貞石以書焉夫人右扶風平陵人也曾祖中水侯祖將作大匠考南郡太守中水侯弟伏波將軍女在淑媛作合孝明誕生孝章婚姻帝室世爲名族夫人

應靈和德精性妙角犀豐盈實有偉表溫慈惠愛

而寡言幼從師氏四禮之教早達窈窕德象之儀及

笄求匹明哲供治婦業孝敬婉孌

音恣女
人之美

畢力中饋

後生仰則以爲謀憲自公歷據王官至宰相夫人營克家道扶翼政事聰明達乎中外隱括及乎無方不出其機化導宣暢童子無驕逸之尤婦妾無捨力之愆故能窮生人之光寵獲福祿之豐報朝春政於王室躬桑繭於蠶宮春秋六十有三寢疾不永懿等追想定省尋思髣髴哀窮念極不知所裁乃申辭曰於

穆母氏其德孔休思齊先始百行聿修宣慈惠和恩
澤並周義方之訓如川之流俾我小子蒙昧以漉音
水流不享遐年以永春秋往而不返潛淪大幽嗚呼
哀哉几筵虛設幃帳空陳品物猶在不見其人魂氣
飄颻焉所安神兄弟何依姊妹何親號咷切怛曾不
我聞吁嗟上天何辜而然傷逝不續往者不旋

濟北相崔君夫人誄

維延熹四年故濟北相崔夫人卒嗚呼哀哉世喪母
儀宗殞憲師哀哀孝子靡所瞻依凡百赴弔至止

清和有德此

悲投涕歔欷共叙赫姿乃為誄曰清和有鑠時惟哲
母令儀令色爰以資始塞淵其心淑慎其止于母斯
勤在子斯敏仰覽篇籍俯釐絲枲多才多藝于何不
有休譽邈焉允女之英乃及崔君惟德是行其德伊
何實粹實明虔恭事幾契澗中饋敦此婉順疾彼攸
遂思齊徽音晨興夜寢穆穆其猷莫之與二天祚明
德底之方穀於赫崔君膺茲祉祿夫人有胤翼此清
淑仁風溫潤義惠優渥推恩中外施浹族食不兼
膳服不織縠以儉為榮以奢為辱堂堂其胤惟世之

良于其令母受茲義方訓以柔和董以嚴剛怒不傷
愛喜不亂莊納之軌度終然允臧是用登膺享其寵
光雖則崇盛猶匪寧息同其婦子茂師其職服貴無
荒尊不舍力密勿不忘惟德之極昔在共姜陪臣之
母勞謙紡績仲尼是紀矧茲夫人帝室命婦猶日孜
孜復禮克己人亦有言仁者壽長宜登永年黃耇無
疆昊天不弔降此殘殃寢疾彌留精爽悴傷慘怛孝
子惴惴其惶靡神不舉無藥不將嗚呼哀哉於是孝
子長叫氣絕復蘇號呼告哀不知其辜昊天上帝忍

弔遺孤尋想遊靈焉識所徂嗚呼哀哉既殯神極薄
言于歸冢宰喪儀循禮無遺切切喪主瘡痍哀哀情
兮長慕涕兮無晞行旅揮涕千里于咨乃謀卜筮言
考其良建彼兆域于時翳藏冥冥窀穸無時有陽燈
燭既滅馬道納光形影不見定省何望嗟其哀矣不
可弭忘日月代序古有如喪由斯夫人榮烈有章配
彼哲彥既隆且昌顧景赫奕饋供孔將惟以慰懷庶
無永傷嗚呼哀哉

蔡中郎文集卷第九

蔡中郎集卷第九

漢 陳留蔡邕著

明新安汪士賢校

明堂月令論

明堂者天子太廟所以崇禮其祖以配上帝者也夏后氏曰世室殷人曰重屋周人曰明堂東曰青陽南曰明堂西曰總章北曰玄堂中央曰太室易曰離也者明也南方之卦也聖人南面而聽天下嚮明而治人君之位莫正於此焉故雖有五名而主以明堂也

其正中皆曰大廟謹承天順時之令昭令德宗祀之禮明前功百辟之勞起養老敬長之義顯教幼誨穉之學朝諸侯選造士於其中以明制度生者乘其能而至死者論其功而祭故爲大教之宮而四學具焉官司備焉譬如北辰居其所而衆星拱之萬象翼之政教之所由生變化之所由來明一統也故言明堂事之大義之深也取其宗祀之貌則曰清廟取其正室之貌則曰太廟取其尊崇則曰太室取其向明則曰明堂取其四門之學則曰太學取其四面周水圓

如璧則曰辟雍異名而同事其實一也春秋因魯取宋之奸賂則顯之太廟以明聖王建清廟明堂之義經曰取郃大鼎于宋戊申納于太廟傳曰非禮也君人者將昭德塞違故昭令德以示子孫是以清廟茅屋昭其儉也夫德儉而有度升降有數文物以紀之聲明以發之以臨照百官百官於是乎戒懼而不敢易紀律所以明大教也以周清廟論之魯太廟皆明堂也魯禘祀周公於太廟明堂猶周宗祀文王於清廟明堂也禮記檀弓曰王齊禘於清廟明堂也孝經

曰宗祀文王於明堂禮記明堂位曰太廟天子曰明堂又曰成王幼弱周公踐天子位以治天下朝諸侯於明堂制禮作樂頒度量而天下大服成王以周公有大勲勞於天下命魯公世世禘祀周公於太廟以天子之禮升歌清廟下管象舞所以異魯於天下也取周清廟之歌歌於魯太廟明魯之太廟猶周之清廟也皆所以昭文王周公之德以示子孫也易傳太初篇曰天子旦入東學晝入南學暮入西學太學在中央天子之所自學也禮記保傅篇曰帝入東學上

親而貴仁入西學上賢而貴德入南學上齒而貴信入北學上貴而尊爵入太學承師而問道與易傳同魏文侯孝經傳曰太學者中學明堂之位也禮記古大明堂之禮曰膳夫是相禮日中出南闈見九侯反問于相日側出西闈視五國之事日入出北闈視帝節猷爾雅曰宮中之門謂之闈王居闈堂之禮又別陰陽門東南稱門西北稱闈故周官有闈闈之學師氏教以三德守王門保氏教以六藝守王闈然則師氏居東門南門保氏居西門北門也知學教國子與

易傳保傳王居明堂之禮參相發明爲學四焉文王
世子篇曰凡大合樂則遂養老天子至乃命有司行
事與秩節祭先師先聖焉始之養也適東序釋奠於
先老遂設三老五更之席位言教學始之於養老由
東方歲始也又春夏學于戈秋冬學羽籥皆習於東
序凡祭與養老乞言合語之禮皆小樂正詔之於冬
序又曰大司成論說在東序然則詔學皆在東序東
序東之堂也學者聚焉故稱詔太學仲夏之月令祀
百辟卿士之有德於民者禮記太學志曰禮士大夫

學于聖人善人祭于明堂其無位者祭于太學禮記
昭穆篇曰祀先賢于西學所以教諸侯之德也卽所
以顯行國禮之處也太學明堂之東序也皆在明堂
辟廡之內月令記曰明堂者所以明天氣統萬物明
堂上通於天象日辰故下十二宮象日辰也水環四
周言王者動作法天地德廣及四海方此水也禮記
盛德篇曰明堂九室以茅蓋屋上圓下方此水名曰
辟廡王制曰天子出征執有罪及釋奠於學以訊馘
告樂記曰武王伐殷薦俘馘于京太室詩魯頌云矯

矯虎臣在泮獻馘京鎬京也太室辟廡之中明堂太室也與諸侯泮宮俱獻馘焉卽王制所謂以訊馘告者也禮記曰祀乎明堂所以教諸侯之孝也孝經曰孝悌之至通於神明光於四海無所不通詩云自西自東自南自北無思不服言行孝者則曰明堂行悌者則曰太學故孝經合以爲一義而稱鎬京之詩以明之凡此皆明堂太室辟廡太學事通文合之義也其制度數各有所法堂方百四十四尺坤之策也屋圜屋徑二百一十六尺乾之策也太廟明堂方三十

六丈通天屋徑九丈陰陽九六之變也圜蓋方載六九之道也八闕以象八卦九室以象九州十二宮以應辰三十六戶七十二牖以四戶九牖乘九室之數也戶皆外設而不閉示天下不藏也通天屋高八十一尺黃鍾九九之實也二十八柱列於四方亦七宿之象也堂高三丈以應三統四鄉五色者象其行外廣二十四丈應一歲二十四氣四周以水象四海王者之大禮也月令篇名曰因天時制人事天子發號施令祀神受職每月異禮故謂之月令所以順陰陽

奉四時効氣物行王政也成法具備各從時月藏之
明堂所以示承祖考神明明不敢泄瀆之義故以明
堂冠月令自天地定位有其象聖帝明君世有紹襲
蓋以裁成大業非一代之事也易正月之卦曰泰其
經曰王用享于帝吉孟春令曰乃擇元日祈穀于上
帝顓頊曆衡曰天元正月己巳朔日立春日月俱起
於泰逮宮室制度月令孟春之月日在營室堯典曰
乃命羲和欽若昊天曆象日月星辰敬授人時令曰
乃命太史守典奉法司天日月星辰之行易曰不利

為寇利用禦寇令曰兵戎不起不可從我始書曰歲
二月同律度量衡中春令曰日夜分則同度量鈞衡
石凡此皆合於大曆唐政其類不可盡稱戴禮夏小
正傳曰陰陽生物之後王事之次則夏之月令也殷
人無文及周而備文義所說傳衍深遠宜周公之所
著也官號職司與周官合周書七十二篇而月令第
五十三古者諸侯朝正于天子受月令以歸而藏諸
廟中天子藏之於明堂每月告朔廟朝出而行之周室
既衰諸侯怠於禮魯文公廢告朔而朝仲尼譏之經

曰閏月不告朔猶朝于廟刺舍大禮而徇小儀也自是告朔遂闕而徒用其羊子貢非廢其令而請去之仲尼曰賜也爾愛其羊我愛其禮庶明王復興君人者昭而明之稽而用之耳無逆聽令無逆政所以臻乎大順陰陽和年穀豐太平洽符瑞由此而至矣秦相呂不韋著書取月令爲紀號淮南王安亦以取爲第四篇改名曰時則故偏見之徒或云月令呂不韋作或云淮南皆非也

月令問答

問者曰子何爲著月令說也予幼讀記以爲月令體大經同不宜與記書雜錄並行而記家記之又畧及前儒特爲章句者皆用其意傳非其本旨又不知月令徵驗布在諸經周官左傳實與禮記通他議橫生紛紛久矣光和元年余被謗章罹重罪徙朔方內有獫狁敵衝之釁外有寇虜鋒鏑之艱危險凜凜死亡無日過被學者聞家就而考之亦自有所覺悟庶幾頗得事情而訖未有注記著於文字也懼顛蹶隕墜無以示後同于朽腐竊誠思之書有陰陽升降天文

曆數事物制度可假以爲本敦辭托說審求曆象其
要者莫大於月令故遂於憂怖之中晝夜密勿昧死
成之旁貫五註參互羣書至及國家律令制度遂定
曆數盡天地三光之情辭繁多而蔓衍非所謂理約
而達也道長日短危殆兢惕取其心盡而已故不能
復加刪省蓋所以探賸辨物庶幾多識前言徃行之
流苟便學者以爲可覽則余死而不朽也

問者曰子說月令多類周官左傳假無周官左傳月
令爲無說乎曰夫根柢植則枝葉必相從也月令與

周官並爲時王政令之記異文而同體官名百職皆
周官解月令甲子沈子所謂似春秋也若夫太昊蓐
收勾芒祝融之屬左傳造義立說生名者同是以用
之

問者曰旣用古文於曆數乃不用三統用四分何也
曰月令所用參諸曆象非一家之事傳之於世不曉
學者宜以當時所施行夫密近者三統已踈濶廢弛
故不用也

問者曰旣不用三統以驚蟄爲孟春春中雨水爲二

月節皆三統法也獨用之何曰孟春月令曰蟄蟲始震在正月也中春始雨水則雨水二月也以其合故用之

問者曰曆云小暑季夏節也而今文見於五月何也曰今不以曆節言據時始暑而記也曆於大雪小雪大寒小寒皆去十五日然則小暑當去大暑十五日不得及四十五日不以節言據時暑也

問者曰中春令不用犧牲以圭璧更皮幣不犧牲何也曰是月獻羔以太牢祀高禘宗廟之祭以中月安

得用犧牲祈者求之祭也著令者豫設水旱疫癘當禱祈用犧牲者是用之助生養傳祈以幣代牲章因於高禘之事乃造說曰更者刻木代牲如廟有祧更此說自欺極矣經典傳記無刻木代牲之說蓋書有轉誤三豕渡河之類也

問者曰中冬令曰奄尹申宮令謹門閭今日門闈何也曰闈尹者內官也主宮室出入宮中宮中之門曰闈闈尹之職也閭里門非闈尹所主知當作闈也

問者曰令曰七駟咸駕今日六駟何也曰本官職者

莫正於周官周官天子馬六種種別有騶故知六騶
左氏傳晉程鄭為乘馬御六騶屬焉無言七者知當
為六也

問者曰令以中秋築城郭於經傳為非其時詩曰定
之方中作於楚宮定營室也九月十月之交西南方
中故傳曰小昏正而栽築即營室也昏正者昏中也
栽築者栽木而始築也今文在前 月不合於經傳
也

問者曰子說三難皆以日行為本古論周官禮記說
以為但逐惡而已獨安所取之曰取之於月令而已
四時通等而夏無難文由日行也春行少陰秋行少
陽冬行太陰陰陽皆使不於其類故冬春難以助陽
秋難以達陰至夏節太陽行太陰自得其類無所扶
助獨不難取之於是也

問者曰反令每行一時轉三旬以應行三月政也春
行夏令則雨水不時謂孟夏也草木蚤枯中夏也國
乃有恐季夏也今總合為一事不分別施之於三月
何也曰說者見其三旬不得傳注而為之說有所滯

礙不得通矣孟秋反令行冬令則草木枯後乃大水
敗其城郭卽分爲三事後乃大水在誰後也城郭爲
獨自壞非水所爲也季冬令曰行春令則胎夭多傷
民多蟲疾命之曰逆卽分爲三事行季冬令爲不感
災異但命之曰逆也知不得斷絕分應一月也其類
皆如此令之所述畧舉其尤者也

問春食麥羊夏食菽雞秋食麻犬冬食黍豕之屬但
以爲時味之宜不合於五行月令服食器械之制皆
順五行者也說所食獨不以五行不已畧乎曰蓋亦

思之矣凡十二辰之禽五時所食者必家人所畜丑
牛未羊戌犬酉雞亥豕而已其餘龍虎以下非食也
春木王木勝土土王四季四季之禽牛屬季夏犬屬
季秋故未羊可以爲春食也夏火王火勝金故酉雞
可以爲夏食也季夏土王土勝水當食豕而食牛土
五行之尊者牛五畜之大者四行之牲無足以配土
德者故以牛爲季夏食也秋金王金勝木寅虎非可
食者犬豕而無角虎屬也故以犬爲秋食也冬水王
水勝火當食馬而禮不以馬爲牲故以其類而食豕

也然則麥爲大菽爲金麻爲火黍爲水各配其牲爲食也雖有此說而米鹽精粹不合於易卦所爲之禽及洪範傳五事之畜近似卜筮之術故予畧之不以爲章句聊以應問見有說而已

問記曰三老五更子獨曰五叟周禮曰八十一御妻今日御妾何也曰字誤也叟長老之稱其字與更相似書者轉誤遂以爲更嫂字女旁瘦字從叟今皆以爲更矣立字法者不以形聲何得以爲字以嫂瘦推之知是更爲叟也妻者齊也惟一適人稱妻其餘皆

妾位最在下是以不得言妻云也

蔡中郎文集卷第十終

蔡邕傳

范曄撰

蔡邕字伯喈陳留圉人也六世祖勲好黃老平帝時
爲郿令王莽初授以厭戎連率勲對印綬仰天歎曰
吾策名漢室死歸其土昔曾子不受季孫之賜况可
事二姓哉遂攜將家屬逃入深山與鮑宣卓茂等同
不仕新室父稜亦有清白行謚曰貞定公邕性篤孝
母常滯病三年邕自非寒暑節變未嘗解襟帶不寢
寐者七旬母卒廬于塚側動靜以禮有鬼馴擾其室
傍又木生連理遠近竒之多往觀焉與叔父從弟同

居三世不分財鄉黨高其義少博學師事太傅胡廣
好辭章數術天文妙操音律桓帝時中常侍徐璜左
官等五侯擅恣聞邕善鼓琴遂白天子勅陳留太守
督促發遣邕不得已行到偃師稱疾而歸闕居翫古
不交當世感東方朔客難及楊雄班固崔駰之徒設
疑以自通乃斟酌羣言韙其是而矯其非作釋誨以
戒厲云爾辭見集中建寧二年辟司徒橋玄府玄甚敬待
之出補河平長召拜郎中校書東觀遷議郎邕以經
籍去聖久遠文字多謬俗儒穿鑿疑誤後學熹平四

年乃與五官中郎將堂谿典光祿大夫楊賜諫議大
夫馬日磾議郎張馴韓說太史令單飈等奏求正定
六經文字靈帝許之邕乃自書冊於碑使工鐫刻立
於太學門外於是後儒晚學咸取正焉及碑始立其
觀視及摹寫者車乘日千餘兩填塞街陌初朝議以
州郡相黨人情比周乃制婚姻之家及兩州人士不
得對相監臨至是復有三互法禁忌轉密選用艱難
幽冀二州久缺不補邕上疏疏見集中書奏不省初帝好
學自造皇義篇五十章因引諸生能爲文賦者本頗

以經學相招後諸為尺牘及工書鳥篆者皆加引召
遂至數十人侍中祭酒樂松賈護多引無行趨勢之
徒並待制鴻都門下熹陳方俗閭里小事帝甚悅之
待以不次之位又市賈小民為宣陵孝子者復數十
人悉除為郎中太子舍人時頻有雷霆疾風傷樹拔
木地震隕雹蝗蟲之害又鮮卑犯境役賦及民六年
七月制書引咎誥羣臣各陳政要所當施行邕上封
事書見集中書奏帝乃親迎氣北郊及行辟雍之禮又詔
宣陵孝子為舍人者悉改為丞尉焉光和元年遂置

鴻都門學畫孔子及七十二弟子像其諸生皆勅州
郡三公舉用辟召或出為刺史太守入為尚書侍中
乃有封侯賜爵者士君子皆耻與為列焉時妖異數
見人相驚擾其年七月詔召邕與光祿大夫楊賜諫
議大夫馬日磾議郎張華太史令單颺詣金商門引
入崇德殿使日常侍曹節王甫就問災異及消改變
故所宜施行邕悉心以對事在五行天文志又特詔
問曰比災變互生未知厥咎朝廷焦心載懷恐懼每
訪群公卿士庶聞忠言而各存括囊莫肯盡心以邕

經學深奧故密特稽問宜披露失得指陳政要勿有
依違自生疑諱具對經術以阜囊封上邕對對見章

奏帝覽而歎息因起更衣曹節於後竊視之悉宣語

左右事遂漏露其為邕所裁黜者皆側目思報初邕

與司徒劉邵素不相平叔父衛尉質又與將作大匠

楊球有隙球即中常侍程璜女夫也璜遂使人飛章

言邕質數以私事請託於邵邵不聽邕含隱切志欲

相中於是詔下尚書召邕詰狀邕上書自陳書見於

是下邕質於洛陽獄劾以仇怨奉公議害大臣大不

敬棄市事奏中常侍呂強愍邕無罪請之帝亦更思

其章有詔減死一等與家屬髡徙朔方不得以赦

今除楊球使客追路刺邕客感其義皆莫為用球又

賂其部主使加毒害所賂者反以其情戒邕故每得

免焉居五原安陽縣邕前在東觀與盧植韓說等撰

補後漢記會遭事流離不及得成因上書自陳奏其

所著十意分別首日連置章左帝嘉其才高會明年

天赦乃宥邕還本郡邕自徙及歸凡九月焉將就還

路五原太守王智餞之酒酣智起舞屬邕邕不為報

智者中常侍王甫弟也素貴驕慙於賓客詬邕曰徒敢輕我邕拂衣而去智銜之密告邕怨於囚放謗訕朝廷內寵惡之邕慮卒不免乃亡命江海遠跡吳會往來依太山羊氏積十二年在吳吳人有燒桐以爨者邕聞火烈之聲知有良木因請而裁爲琴果有美音而其尾猶焦故時人名曰焦尾琴焉初邕在陳留也其鄰人有以酒食召邕者比往而主以醜焉客有彈琴於屏邕至門試潛聽之曰愜以樂召我而有殺心何也遂反將命者告主人曰蔡君向來至門而去

邕素爲邦鄉所宗主人遽自追而問其故邕具以告莫不憮然彈琴者曰我向鼓絃見螳螂方向鳴蟬蟬將去而未飛螳螂爲之一前一卻吾心聳然惟恐螳螂之失之也此豈爲殺心而形於聲者乎邕莞然而笑曰此足以當之矣中平六年靈帝崩董卓爲司空聞邕名高辟之稱疾不就卓大怒詈曰我力能族人蔡邕遂偃蹇者不旋踵矣又切勅州郡舉邕詣府邕不得已到署祭酒甚見敬重舉高第補侍御史又轉待書御史遷尚書三日之間周歷三臺遷巴郡太守

復留爲侍中初平元年拜左中郎將從獻帝遷都長安封高陽鄉侯董卓賓客部曲議欲尊卓比太公稱尚父卓謀之於邕邕曰太公輔周受命翦商故特爲其號今明公威德誠爲巍巍然比之尚父愚意以爲未可宜須關東平定車駕還反舊邦然後議之卓從其言初平二年六月地震卓以問邕邕對曰地動者陰盛侵陽臣下踰制之所致也前春郊天公奉引車駕乘金華青蓋爪畫兩轡遠近以爲非宜卓於是改乘皂蓋車卓重邕才學厚相遇待每集讌輒令邕鼓

琴贊事邕亦每存匡益然卓多自佞用邕恨其言少邕謂從弟谷曰董公性剛而遂非終難濟也吾欲東奔兗州若道遠難達且遯逃山東以待之何如谷曰君狀異恒人每行觀者盈集以此自匿不亦難乎邕乃止及卓被誅邕在司徒王允坐殊不意言之而歎有動於色允勃然叱之曰董卓國之大賊幾傾漢室君爲王臣所宜同忿而懷其私遇以忘大節今天誅有罪而反相傷痛豈不共爲逆哉卽收付廷尉治罪邕陳辭謝乞黥首刖足繼成漢史士大夫多矜救之

不能得太尉馬日磾馳往謂允曰伯喈曠世逸才多
識漢事當續成後史爲一代大典且忠孝素著而所
坐無名誅之無乃失人望乎允曰昔武帝不殺司馬
遷使作謗書流於後世方今國祚中衰神器不固不
可令佞臣執筆在幼主左右旣無益聖德復使吾黨
蒙其訕議日磾退而告人曰王公其不長世乎善人
國之紀也制作國之典也滅紀廢典其能久乎邕遂
死獄中允悔欲止而不及時年六十一摺紳諸儒莫
不流涕北海鄭玄聞而歎曰漢世之事誰與正之充

州陳留聞皆畫像而頌焉其撰集漢事未見錄以
後史適作靈紀及十意又補諸列傳四十二篇因李
催之亂湮沒多不存所著詩賦碑誄銘讚連珠箴
論議獨斷勸學釋誨叙樂大叙篆執祝文章表書記
凡百四篇傳於世

論曰意氣之感士所不能忘也流極之運有生所
共深悲也當伯喈抱鉗扭徙幽裔仰日月而不見
照燭臨風塵而不得經過其意豈及語平日倖全
人哉及解刑衣竄甌越潛舟江壑不知其遠捷步

深林尚苦不密但願北首舊丘歸骸先壟又可得
乎董卓一旦入朝辟書先下分明枉結信宿三遷
匡導既申在僭屢革資同人之先號得北叟之後
福屬有慶者夫豈無懷君子斷刑尚或爲之不舉
况國憲倉卒慮不先圖矜情變容而罰同邪黨執
政乃追怨子長謗書流後放此爲戮未或聞之
贊曰季長戚氏才通情侈苑囿典文流悅音伎邑
實慕靜心精辭綺斥言金商南徂北徙籍梁懷
名澆身毀

胡廣黃瓊頌

巖巖山嶽配天作輔降神有周生申及甫允茲漢室
誕育二后曰胡曰黃方軌齊武惟道之淵惟德之藪
股肱元首代作心膂天生蒸人有則有類我胡我黃
鍾厥純懿巍巍特進仍踐其位赫赫三事七佩其綬
奕奕四牡沃若六轡袞職龍章其文其蔚叅曜乾台
窮寵極貴功加八荒羣生以遂超哉邈乎莫與爲二

上漢書十志疏

朔方髡鉗徙臣邕稽首再拜上書皇帝陛下臣邕被
受陛下寵異大恩初由宰府備數典城以親父故依
叔父衛尉質時以尚書召拜中郎受詔詣東觀著作
遂與羣儒並拜議郎沐浴恩澤承荅聖問前後六年
質奉機密趨走陛下遂由端右出相外藩還尹輦載

旬日之中登攝上列父子一門兼受恩寵不能輸寫
心力以効絲髮之功一旦被章陷沒辜戮陛下天地
之德不忍刀鋸截首領得就平罪父子家屬徙充邊
方完全軀命喘息相隨非臣無狀所敢復望非臣罪
惡所當復蒙非臣辭筆所能復陳臣初決罪籓陽歸
獄生出牢戶顧念元初中故尚書郎張俊坐漏泄事
當服重刑已出轂門復聽續鞠詔書馳救一等輸作
左校俊上書謝恩遂以轉徙邕爲郡縣僂遣編於吏
手不得頃息會辭抱悲無由上達既到徙所乘塞守

烽職在候望憂怖焦灼無心復能操筆成草致章闕
庭誠知聖朝不責臣謝但懷愚心有所不竟臣自在
布衣常以爲漢書十志下盡王莽而止世祖以來唯
有紀傳無續志者臣所師事故太傅胡廣知臣頗識
其門戶畧以所有舊事與臣雖未備悉粗見首尾積
累思惟二十餘年不在其位非外吏庶人所得擅述
天誘其衷得備著作郎建言十志皆當撰錄遂與議
郎張華等分受之其難者皆以付臣先治律曆以籌
算爲本天文爲驗請太師魯注考校連年往往頗有

差舛當有增損乃可施行爲無窮法道至深微不可
獨議郎中劉洪密於用算故臣表上洪與共參思圖
牒尋繹度數適有頭緒會臣被罪逐放邊野臣竊自
痛一爲不善使史籍所闕胡廣所校二十年之思中
道廢絕不得究竟悽悽之情猶以結心不能自達臣
初欲須刑竟乃因縣道具以狀聞今年七月九日匈
奴攻鹽池縣其時鮮卑連犯雲中五原一月之中烽
火不絕不意西夷相與合謀所圖廣遠恐遂爲變不
知所濟郡縣咸懼不知所守且臣所在孤危懸

鋒鏑湮滅土灰呼吸無期誠恐所懷隨軀腐朽抱恨
黃泉遂不設施輒先顛踣科條諸志臣欲刪定者一
所當接續者四前志所無臣欲著者五及經典群書
所宜摭摭本奏詔書所當依據分別首目并書章左
臣初考逮妻子迸竄亡失文書無所按請加以惶怖
愁恐思念荒散十分不得識一所識者又恐謬誤觸
冒死罪披擻愚情願下東觀推求諸奏叅以璽書補
綴遺闕昭明國體章聞之後雖肝腦流離白骨剖破
無所復恨惟陛下留神省察謹因臨戎長霍圍封上

臣頓首死罪稽首再拜以聞

蔡中郎集卷第四

漢 陳留蔡邕著

明新安汪士賢校

述行賦

延熹二年秋霖雨逾月是時梁冀新誅而徐璜左悺
五侯擅貴於其處又起顯明苑于城西人徒凍餓不
得其命者甚衆白馬令李雲以直言死鴻臚陳君以
救雲抵罪璜以余能鼓琴自朝廷敕陳留郡守遣余
到偃師病不前得歸心憤此事遂託所過述而成賦

余有行于京洛兮邁淫雨之經時塗迤邐其蹇連兮
潦汙滯而爲災馬桀躡而不進兮心鬱悒而憤思聊
弘慮以存古今宣幽情而屬詞久余宿于大梁兮詣
無忌之稱神哀晉鄙之無辜兮忿朱亥之篡軍歷中
牟之舊城兮憎佛盼之不臣問寧越之裔胄兮貌髮
髯而無聞經圃田而瞰北境兮晤衛康之封疆迄管
邑而增感歎兮愠叔氏之啓商過漢祖之所隘兮弔
紀信於滎陽降虎牢之曲陰兮路直墟以盤縈勤諸
侯之遠戍兮侈申子之美城稔清塗之復忠兮陷夫

人以大名登長坂以凌高兮陟葱山之巖峩建撫

而立洪高兮經萬世而不傾廻峭峻以降阻兮小阜

寥其異形岡岑紆以連屬兮谿谷負幸現二音 其香

冥迫嵯峨以乖邪兮廓巖壑以崢嶸攢械樸而雜榛

楛兮被浣濯而羅布且莢蕒與臺菌兮緣層崖而結

莖行遊目以南望兮覽太室之威靈顧大河于北垠

兮瞰洛汭之始并追劉定之攸儀兮美伯禹之所營

悼太康之失位兮愍五子之歌聲尋修軌以增舉兮

邈悠悠之未央山風泊以颺涌兮氣慄慄而厲涼雲

鬱術而四塞兮雨濛濛而漸唐僕夫疲而劬瘁兮我
馬虺頽以玄黃格莽丘而稅駕兮陰曠曠而不陽衰
衰周之多故兮眺瀕隈而增感念子帶之淫逸兮唁
言鴈弔失襄王於壇坎悲寵嬖之爲梗兮心惻愴而
國曰唁懷燥乘舫舟而沂湍流兮浮清波以橫厲想宓妃之
靈光兮神幽隱以潛翳實熊耳之泉液兮總伊瀍與
澗瀨通渠源於京城兮引職貢乎荒裔操吳榜其萬
艘兮充土府而納最濟西溪而容與兮息鞏都而後
逝愍簡公之失師兮疾子朝之爲害玄雲黯以凝結

兮集零雨之溱溱路阻敗而無軌兮涂濘溺而難遵
率陵阿以登降兮赴偃師而釋勤壯田橫之奉首兮
義二士之俠憤佇淹留以候霽兮感憂心之殷殷并
日夜而遙思兮宵不寐以極晨候風雲之體勢兮天
牢湍而無文彌信宿而後闕兮思逶迤以東運見陽
光之顥顥兮懷少弭而有欣命僕夫其就駕兮吾將
往乎京邑皇家赫而天居兮萬方徂而並集貴寵扇
以彌熾兮僉守利而不戢前車覆而未遠兮後乘驅
而競入窮變巧於臺榭兮民露處而嘖濕清嘉穀于

禽獸兮下糠粃而無粒弘寬裕於便辟兮糾忠諫其
駸急懷伊呂而黜遂兮道無因而獲入唐虞眇其既
遠兮常俗生於積習周道鞠為茂草兮哀正路之日
忽音忽及也觀風化之得失兮猶紛掌其多違無亮采以
匡世兮亦何為乎此畿甘衡門以寧神兮詠都人而
思歸爰結蹤而迴軌兮復邦族以自綏亂曰跋涉遐
路艱以阻兮終其永懷窘陰雨兮歷觀羣都尋前緒
兮考之舊聞厥事舉兮登高斯賦義有取兮則善戒
惡豈云苟兮翩翩獨征無儔與兮言旋言復我心胥

兮

短人賦

侏儒短人音醜容止僥之後出自外域戎狄別種
去俗歸義慕化企踵遂在中國形貌有部名之侏儒
生則象父唯有晏子在齊辨勇匡景拒崔加刃不恐
其餘厄么劣厥僂窶嘯音或叫呼也噴怒語與人相拒矇
昧嗜酒喜索罰舉醉則揚聲罵詈恣口衆人患忌難
與竝侶是以陳賦引譬比偶皆得形象誠如所語其
詞曰雄荆鷄兮鶩鶩鵠鵠兮鷄鷄鷓冠戴勝兮

啄木兒觀短人兮形若斯熱地蝗兮蘆卽且蠶中蛹
兮蠶蠕須視短人兮形若斯木門閭兮梁上柱敞鑿
頭兮斷柯斧鞞鞞鼓兮補履樸脫椎杓兮擣衣杵視
短人兮形如許



飲馬長城窟行

青青河邊草，縣縣思遠道。遠道不可思，宿昔夢見之。
夢見在我旁，忽覺在他鄉。他鄉各異縣，展轉不可見。
枯桑知天風，海水知天寒。入門各自媚，誰肯相為言。
客從遠方來，遺我雙鯉魚。呼童烹鯉魚，中有尺素書。
長跪讀素書，書中竟何如。上有加飡食，下有長相憶。

篆勢

字畫之始，因於鳥跡。蒼頡循聖作，則制文體。有六篆
巧妙入神，或象龜文，或比龍鱗。紆體放尾，長翅短身。
頡若黍稷之垂穎，蘊若虫蛇之棼緼。揚波振擊，龍蛇

鳥震延頸，脅翼勢欲凌雲。或輕舉內投，微本濃末。若

絕若連似，冰露緣絲。凝垂下端，從者如懸。衡者如編

杪者邪趣，不方不圓。若行若飛，岐岐翾音喧翾音曉。遠

而望之若鴻鵠羣遊，絡繹遷延。迫而視之，湍際不可

得見。指揮不可勝原，研桑不能數其詰。屈離婁不能

覩其隙，間般倅揖讓而辭。巧籀誦拱手而鞞，翰處篇

籍之首，日粲粲彬彬。其可觀，摘華豔於紈素。為學藝

之範，閑嘉文德之弘懿。蘊作者之莫刊，思字體之俯

仰舉大略而論旃。

隸勢

鳥跡之變乃惟佐隸蠲彼繁文崇此簡易厥用既行
體象有度負若星陣鬱若雲布其大徑尋細不容髮
隨事從宜靡有常制或穹窿恢廓或櫛比鍼列或砥
繩平直或蜿蜒繆戾或長邪角趣或規旋矩折修短
相副異體同勢奮華輕舉離而不絕纖波濃點錯落
其間若鍾簾音巨設張庭燎飛煙嶄嵒崔嵬高下屬連
似崇臺重宇層雲冠山遠而望之若飛龍在天近而
察之心亂目眩奇姿譎誕不可勝原研彙所不能計

宰賜所不能言何草篆之足算而斯文之未宣豈體
大之難覩將秘奧之不傳聊佇思而詳觀舉大略而
論旃

釋誨

閒居翫古不交當世感東方客難及楊雄班固崔駰
之徒設疑以自通乃斟酌羣言音律是也其是而矯其
非作釋誨以戒厲云爾有務世公子誨於華顛胡老
曰蓋聞聖人之大寶曰位故以仁守位以財聚人然
則有位斯貴有財斯富行義達道士之司也故伊摯
有負鼎之術音眩仲尼設執鞭之言甯子有清商之歌
百里有豢牛之事夫如是則聖哲之通趣古人之明

志也夫子生清穆之世稟醇和之靈覃思典籍韞積
六經安貧樂賤與世無營沉精重淵抗志高冥包括
無外綜析無形其已久矣曾不能拔萃出群揚芳飛
文登天庭序彞倫掃六合之穢慝清宇宙之埃塵運
光芒於白日屬炎氣於景雲時逝歲暮默而無聞小
子惑焉是以有云方今聖上寬明輔弼賢知崇英逸
偉不墜於地德弘者建宰相而裂土才美者荷榮祿
而蒙賜蓋亦回塗要至俛仰取容輯當世之利定不
拔之功榮家宗於此時遺不滅之令蹤夫獨未之

邪何爲守彼而不通此胡老傲然而笑曰若公子所
謂覩曖昧之利而忘昭誓之害專必成之功而忽蹉
跌之敗者已公子謾爾歛袂而興曰胡爲其然也胡
老曰居吾將釋汝昔自太極君臣始基有義皇之洪
寧唐虞之至時三代之隆亦有緝熙五伯扶微勤而
撫之千斯已降天綱縱人紘弛王塗壞太極墮君臣
土崩上下瓦解於是智者騁詐辯者馳說夫奮畧戰
士講銳電駭風馳霧散雲披變詐乖詭以合時宜或
畫一策而縮萬金或談崇朝而錫瑞珪連衡者六印

磊落合縱者駢組陸離隆貴翕習積富無滙據巧蹈
機以忘其危夫華離帝而萎條去榦而枯女冶容而
淫士背道而辜人毀其蒲神疾其邪利端始萌害漸
亦芽速速方轂夭夭是加欲豐其屋乃葺其家是故
天地否閉聖哲潛形石門守晨沮溺耦耕顏歎音出怒氣
也抱璞遽瑗保生齊人歸樂孔子斯征壅渠驂乘逝
而遺輕夫豈傲主而背國乎道不可以傾也且我聞
之日南至則黃鍾應融風動而魚上冰蕤賓統則微
陰萌蕪葭蒼而白露凝寒暑相推陰陽代興運極則



化理亂相承今大漢紹陶唐之洪烈盪四海之殘災
隆隱天之高折紲地之基皇道惟融帝猷顯丕音池泝
泝庶類含甘吮滋檢六合之羣品躋之乎雍熙羣僚
恭已於職司聖主垂拱乎兩楹君臣穆穆守之以平
濟濟多士端委縉緹音傳絲緹綬也鴻漸盈階振鷺克庭譬
猶鍾山之玉泗濱之石累珪璧不爲之盈採浮磬不
爲之索曩者洪源闢而四隩集武功定而干戈戢音
音顯北狄也音允攘而吉甫宴城濮捷而晉凱入故當其
有事也則簞笠並載襁甲揚鋒不給於務當其無事

也則舒紳緩佩鳴玉以步綽有餘裕夫世臣闕子誓音御之族天隆其祐主豐其祿抱膺從容爵位自從攝須理髯餘官委責其進取也順傾轉圜不足以喻其便逡巡放縱不足以况其易夫夫有逸羣之才人人有優贍之智童子不問疑於老成瞳矇不稽謀於先生心恬澹於守高意無爲於持盈燦乎煌煌莫非華榮明哲泊焉不失所寧狂淫振蕩乃亂其情貪夫徇財誇者死權瞻仰此事體躁心煩闇謙盈之効迷損益之數騁駑駘於修路慕騏驎而增驅卑俯乎外

戚之門乞助乎近貴之舉榮顯未副從而顛路下獲熏胥之辜高受滅家之誅前車已覆襲軌而駑曾不鑒禍以知畏懼予誰悼哉害其若是天高地厚跼而踣之怨豈在明患生不思戰戰兢兢必慎厥尤且用之則行聖訓也舍之則藏至順也九河盈溢非一由音塊所防帶甲百萬非一勇所抗今子責匹夫以清宇宙庸可以水旱而累堯湯乎懼煙炎之燬音燬音尖也何光芒之敢揚哉且夫地將震而樞星直井無景則日陰食元首寬則望舒朏侯王肅則月側匿是以

君子推微達著尋端見緒履霜知冰踐露知暑時行則行時止則止消息盈冲取諸天紀利用遭泰可與處否樂天知命持神任已羣車方奔乎險路安能與之齊軌思危難而自豫故在賤而不耻方將騁馳乎典籍之崇塗休息乎仁義之淵數盤旋乎周孔之庭宇揖儒墨而與爲友舒之足以光四表收之則莫能知其所有若乃丁千載之運應神靈之符闔闔乘天衢擁華蓋奉皇樞納玄策於聖德宣太平於中區計合謀從已之圖也勲績不立予之幸也龜鳳山

霧露不除踴躍草萊祇見其愚不我知者將謂之迂修業思真棄此焉如靜以俟命不斃不渝百歲之後歸乎其居幸其獲稱天所誘也罕漫而已非已咎也昔伯翳綜聲於鳥語葛盧辨音於鳴牛董父受氏於豢龍奚仲供德於衡軒倕氏興政於巧工造父登御於驂騮非子享土於善圍狼臙視貌取右於禽囚弓父畢精於筋角次音飛明勇於赴流壽王創基於格五東方要幸於談優上官効力於執蓋弘羊據相於運籌僕不能參跡於若人故抱璞而優游於是公



子俛首降階忸怩而避胡老乃揚衡含笑援琴而歌
歌曰練予心兮浸太清滌穢濁兮存正靈和液暢兮
神氣寧情志泊兮心亭亭嗜欲息兮無由生蹕音宇
宙而遺俗兮眇翩翩而獨征